

ԵՐԵՎԱՆԻ ԿԱՆՈՆ

ՄԱՅՐ ԱՅՈՒՆ ՍՈՒՐԲ ԷԶՄԻԱՏՆԻ
ԿՐՈՆԱԿԱՆ, ՄԵԿԱՌԻԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ



Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի ուղերձը Հանրապետության տոնի առիթով

Համայն հայության հոգևոր կենտրոն Մայր Աթոռ Սուրբ Էջմիածնից Մեր օրհնությունն ու բարեմայությանը ներքին հոգևոր աշխարհապարհում մեր ժողովրդին՝ Հանրապետության տոնի առիթով:

Մայիսյան հերոսամարտերի պատմական իրադարձությունները անկյունաքարային նշանակություն ունեցան հայոց պետականության վերականգնման՝ Հայաստանի Առաջին Հանրապետության ստեղծման և մեր ազգային կյանքի վերազարթոնքի գործում: Հայոց ցեղասպանության սուսկալի ողբերգությունը վերապրած մեր ժողովուրդը կենաց ու մահու պայքարի ելավ և կերտեց իր փառապանծ հաղթանակները:

Այս օրերին, երբ անվտանգային լրջագույն սպառնալիքների և զոյաբանական հիմնախնդիրների առջև ենք, հրամայական է, որ միասնական, ամենկուր ու հաստատական լինենք՝ ընդդեմ մեր ազգային կյանքը փոթորկող ներքին և արտաքին մարտահրավերների:

Մի րե լինե՛ք, Հանրապետության տոնի առիթով՝ Հայրապետիս մաղթանքն է, որ հանուն հայրենական մեր կյանքում խաղաղության հաստատման և արժանապատիվ գոյության, նպատակալաց հանձնարությամբ և առ հայրենին սիրով ձեռնամուխ լինենք մեզ պատուհասած աղետների ու փորձությունների հաղթահարմանը և հզոր ու անվտանգ մեր պետության կերտմանը: Վանենք մեզանից կործանարար անտարբերությունը, փարատենք լքանալության ու ատելության մթնոլորտը, որպեսզի միասնականության հուսառատ ու գործող ոգով հաստատենք մեր կյանքում ապահովություն և խաղաղություն:

Աղոթում ենք, որ երկնավոր Տերը պահպանի և օգնական լինի մեր ժողովրդին՝ ամուր պահելու աստվածապարզ և մեր ազատությունն ու անկախ պետականությունը և համազգային ներուժով շին ու բարօր դարձնելու մեր նվիրական հայրենիքը:



Գերագույն հոգևոր խորհրդի ժողով Մայր Աթոռ Սուրբ Էջմիածնում

Մայիսի 27-ին Մայր Աթոռ Սուրբ Էջմիածնում, նախագահությամբ Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի, տեղի ունեցավ Գերագույն հոգևոր խորհրդի ժողով: Ժողովը հանդես եկավ հայտարարությամբ:

ՀԱՅՏԱՐԱՐՈՒԹՅՈՒՆ

Երկրում ստեղծված ճգնաժամի խորացման պատճառով այս օրերին իրենց խաղաղ բողոքն արտահայտող քաղաքացիների նկատմամբ ոստիկանները կիրառում են ակնհայտ անհամաչափ ուժ՝ բռնությունների դատապարտելի դրսևորումներով: Հասարակական կարգի պահպանությանը կոչված ծառայողների նմանօրինակ գործողությունները խորացնում են ներհասարակական լարվածությունը և կարող են հանգեցնել անկանխատեսելի հետևանքների:

Մեր կոչն է ոստիկաններին՝ իրենց պարտականությունների կատարման ընթացքում հարգել հայրենակիցների հիմնարար իրավունքները, ազատությունները, պատիվն ու արժանապատվությունը և գործել միմիայն մարդասիրության և օրինականության սկզբունքների խստագույն պահպանությամբ:

Մեր հորդորն է նաև համրային գործողությունների մասնակիցներին իրենց բողոքն արտահայտել բացառապես օրենքի շրջանակներում, առաջնորդվել զգոնությամբ և չտրվել հնարավոր սադրանքների:

Միաժամանակ պատգամում ենք Հայաստանյայց Առաքելական Սուրբ Եկեղեցու զավակներին և մեր բոլոր հայրենակիցներին՝ այս բարդ իրադրության մեջ դրսևորել պատասխանատվություն և ամենայն ջանք գործադրել ի խնդիր հայրենիքի առջև ծառացած գոյաբանական մարտահրավերների հաղթահարման, հայոց պետականության անխաթար պահպանության և ամրապնդման:

Թող ամենագոր Աստված օրհնի և խաղաղություն պարգևի մեր հայրենիքին, համերաշխություն և հուսառատ կյանք՝ մեր ժողովրդին:

Հայաստանյան եպիսկոպոսների և թեմակալ առաջնորդների ժողով Մայր Աթոռում

Մայիսի 23-ին Մայր Աթոռ Սուրբ Էջմիածնում, նախագահությամբ Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի, տեղի ունեցավ հայաստանյան եպիսկոպոսների և թեմակալ առաջնորդների ժողով:

Ժողովի օրակարգում ընդգրկված նյութերը վերաբերում էին հայրենիքի առջև ծառացած մարտահրավերներին, հասարակությանը հուզող հիմնախնդիրներին և Եկեղեցու առաքելությանն առնչված հարցերին:

Անդրադարձ կատարվեց նաև վերջին օրերին ՀՀ իշխանությունների կողմից Հայ Եկեղեցու հասցեին բարձրաձայնվող մեղադրանքներին, որոնց առիթով ժողովը հանդես եկավ հայտարարությամբ:

ՀԱՅՏԱՐԱՐՈՒԹՅՈՒՆ

ՀՀ իշխանության տարբեր ներկայացուցիչներ, այդ թվում և վարչապետը, Տավուշում սահմանազատման ու սահմանագծման անվան ներքո կատարվող

տարածքային միակողմանի զիջումների դեմ համրային ընդվզման այս օրերին վերստին սկսել են թիրախավորել Հայաստանյայց Առաքելական Սուրբ Եկեղեցին՝ հրապարակ

մեղադրությամբ կեղծ հայտարարություններ և ճշմարտագույն տեսություններ՝ առնչված Եկեղեցու պատմական առաքելությանն ու ներկա գործունեությանը:

Առավել քան զարմանալի է, որ մերկապարանոց մեղադրանքներ են հնչեցվում Եկեղեցու կողմից հարկեր չվճարելու առնչությամբ, երբ պաշտոնական վիճակագրություններն ուղղակի փաստում են ՀՀ օրենքով սահմանված հարկային պարտավորությունների կատարման մասին: Հատկապես դատապարտելի է, երբ կառավարության ղեկավարը անհիմն մեղադրություններով և անսքող դիտավորությամբ Հայ Եկեղեցուն ամբաստանում է ինչպես անցյալում, այնպես և այսօր «ազդեցության գործակալ» լինելու մեջ:

Ցավ ենք արտահայտում, որ գործող իշխանությունները Եկեղեցի—պետություն հարաբերություններում առկա խնդիրներն արծարծում են անվայելուչ իրենց հանգամանքին, նաև սպառնալիքների, ճնշումների և ապատեղեկատվության գործիքակազմերի օգտագործմամբ: Հարկ է, որ ՀՀ իշխանության ներկայացուցիչները ազգի և հայրենիքի առջև իրենց պատասխանատվության գիտակցությամբ անդրադառնան Եկեղեցու պատմական հայրենաշեն ու ազգապահպան դերակատարությանը, ինչն ամրագրված է նաև ՀՀ Սահմանադրությամբ, և վերատեսության ենթարկեն որդեգրած քաղաքականությունը: Աղոթում ենք, որ Աստված խաղաղություն պարգևի մեր հայրենիքին, բարօրություն ու ապահովություն մեր ժողովրդին:

Հայրապետի և հոգևոր դասի՝ Սարգսրապատի հուշահամալիրի մուտքն արգելափակող ՀՀ ոստիկանության ապօրինի գործողությունների առիթով

Խստորեն դատապարտում ենք ս. թ. մայիսի 28-ին Սարգսրապատում տեղի ունեցած անթույլատրելի միջադեպը, ինչը, ցավոք, հերթական անգամ իրավականորեն և բարոյապես խայտառակեց Հայաստանի Հանրապետությունը: Դա քաղաքական քիմախորությունից այն կողմ պաշտոնական նպատակաուղղված հարձակում էր ազգային ինքնության և արժեքաբանության 1700-ամյա կառույցի դեմ: Ակնհայտ է՝ ով է այդ արգելափակումը և նսեմագույն հրահանգն արձակողը, որը բունտերանգի արդյունք ունեցավ հենց իր՝ իշխանության, մանավանդ ուժային հայտնի կառույցի համար, քանի որ վերջինս արժանապատվությունից ցածր կամակատարություն դրսևորեց՝ Հայոց եկեղեցու Գահակալի դեմ ծրագրված հանցանքն իրագործելով:

Մայր Աթոռ Ս. Էջմիածնի կողմից պետական արարողակարգի պատասխանատուին իրազեկվել էր Սուրբ Պատարագի և Հանրապետության համար մատուցվող մաղթանքի ավարտին Վեհափառ Հայրապետի՝ Սարգսրապատի հուշահամալիր այցի ժամի մասին, հետևաբար՝ տեղի ունեցածը ՀՀ օրվա քաղաքական իշխանության կողմից ծրագրված անհանդուրժելի հանցանք է, պետական գործչին անվայել և անբարոյ կեցվածք:

Ամենայն Հայոց Կաթողիկոսի և ուղեկցող հոգևորականների հանդեպ ոստիկանների անարժանապատիվ գործողությունների կապակցությամբ ՀՀ վարչապետի և իշխանական որոշ պաշտոնյաների մեկնաբանությունները կառավարության ղեկավարին և «պետական այրին» պատշաճ պատասխաններ չեն և չեն դիմանում որևէ քննության: Ոչ մի դատապարտողական և մեղադրական խոսք, այլ կեղծ ու անհեթեթ հիմնավորում և իրողության ու կատարվածի խեղաթյուրում: Վեհափառ Հայրապետին պաշտոնական մակարդակով սաղորդող վերագրումը նպատակ ունի եկեղեցին թիրախավորելու և քաղաքական միտումներ իրագործելու: Հիշեցնենք, որ պետական արարողակարգի մասին օրենքի 10-րդ հոդվածի 2-րդ մասի համաձայն՝ Ամենայն Հայոց Վեհափառ ինքնուրույնաբար է որոշում իր մասնակցությունը, և որևէ հրավեր կամ թույլտվություն չի կարող պահանջվել Վեհափառի մասնակցության պարագայում, և Վեհափառն իր վարչապետի նկատմամբ ունի ավերակություն: Հետևաբար՝ ոստիկանության գործողություններն ամբողջությամբ անօրինական են, քրեական օրենսգրքի հատուկ հոդվածով՝ դատապարտելի:

Բազմաթիվ սրբազանի առաջնորդած «Տավուշը հանում հայրենիքի» շարժման հետ միջադեպի պատճառահետևանքային առնչության՝ ՀՀ վարչապետի տիրապետչական մեկնաբանությունը ևս որևէ ողջամիտ դատողությունից դուրս է: Բացի այդ՝ Սրբազան պառքարը միակողմանի զիջումներով կեղծ «խաղաղության դարաշրջան» կերտելու, Հայաստանի իշխանության պարտավորական, աղետաբեր քաղաքականության դեմ է՝ անվտանգային մոր մարտահրավերներին ընդառաջ, և արժեքաբանական առումով միանգամայն հակադարձ բևեռների երևույթներ են արդարացի պայքարն ու վերոնշյալ խորշելի միջադեպը:



Ամենակարևորը՝ միջադեպը Հայ Առաքելական եկեղեցու նկատմամբ հետևողական քաղաքականության հերթական դրսևորումն է, այս անգամ՝ մեր պատմության խորհրդանշական տոնին՝ մայիսի 28-ին: Սարգսրապատը հայ ժողովրդի վերագարծնքի և լինելության վերահաստատման, մեր ազգային միասնության ու ճակատագրական հաղթանակի խորհրդանիշն է: Մայր Աթոռը և հայ հոգևորականությունը վճռորոշ դեր են խաղացել կենաց ու մահու կռիվ տալու և պետականությունը վերականգնելու արժանապատիվ գործում: Նվիրական այդ օրը փորձելով բախում հրահրել և արգելել Ամենայն Հայոց Կաթողիկոսի թափորը Սարգսրապատի հուշահամալիր՝ ՀՀ կառավարության ղեկավարը փորձեց նաև անարգել օրվա հոգևոր-եկեղեցական խորհուրդը՝ սրբավայրում հայ մահադատների հիշատակը ոգեկոչելու և վաճառելի հայրենյաց անկախության պահպանման աղոթք վերառաքելու:

Մայր Աթոռը, ինչպես միշտ, դրսևորեց պետականամետ կեցվածք և բարձր գիտակցություն՝ թույլ չտալով բախում, սթափություն հորդորելով, և ոստիկանական պատնեշը ճեղքելով՝ այնուամենայնիվ կատարեց իր հոգևոր առաքելությունը՝ աղոթքի ձայները դիտավորյալ խլացնող ոստիկանական հրահանգների ներքո: Իսկ թե ինչու անարգաբար փորձ արվեց կասեցնել աղոթական պահը՝ զոհերի հիշատակի և հայրենիքի անվտանգության համար, թողնում ենք ընթերցողի տրամաբանությանը:

Եկեղեցու՝ ցայտմ հնչող դաստիարակչական հորդորներն ու կոչերը «անառակ գավակներին» դարձի բերելու ուղղությամբ այլևս անօգուտ են, երկիրն արմաքանվում, չքանում է անդառնալիորեն: Իրեն անընդհատ Պապ թագավորի հետ համեմատող ՀՀ կառավարության ղեկավարը, ցավոք, չի հասնի ինքնաճանաչողության, չի գիտակցի, որ որպես պետական գործիչ՝ ինքը, ղեքախտաբար, շատ հեռու է Պապ թագավորից, որովհետև Պապի օրոք

Հայաստանը կարճ ժամանակամիջոցում վերականգնեց իր տարածքային ամբողջականությունը, Պապը ստեղծեց հզոր և մեծաթիվ բանակ, երկու աշխարհակալ տերություններից փորձեց անկախանալ ազդեցության առումով և զոհ դարձավ Հայաստանի անկախացման ճանապարհին: Պապ թագավորի առաքելությունը նսեմացվում և անարգվում է քննության չդիմացող այդ նույնացումով, քանի որ այսօր Հայաստանն ունենում է տարածքային մեծ կորուստներ, հազարավոր զոհեր ու բռնադատվածներ, մեր պետականությանը հասցվել է ողնաշարային ջարդվածք, ընկճվել է ժողովրդի դիմադրողական ոգին: Ինչ վերաբերում է եկեղեցու իրավունքների կրճատման երևակայական զուգահեռին, ապա 4-րդ դարի և այսօրվա եկեղեցու իրավունքները բոլորովին անբաղադատելի են:

Հայ Առաքելական եկեղեցին սկզբունքային և կամային կեցվածք է դրսևորում այս ամբողջ ընթացքում, մարդասիրաբար զգույնության և ողջախոհության կոչեր հղում:

Այսպանից հետո դառնանք հիմնական հարցին՝ որո՞նք են ՀՀ իշխանության՝ եկեղեցու նկատմամբ քաղաքականության բուն պատճառները:

ՀՀ քաղաքական իշխանությունը, օտար և թշնամի պետությունների ազդեցության ցանցում զոհելով Հայաստանի շահերը, բացահայտ դրսևորում է նաև աղանդավորական կեցվածք՝ կազմաքանդելով ինչ որ ազգային է, սև ու սպիտակի բևեռացումներով բաժանումներ կատարելով ժողովրդի մեջ, ինքնաստվածացումով և այլն: Աշխարհաքաղաքացիության, անկրոնականության, ապազգայնության իրավիճակ թելադրելով՝ իշխանությունը նպատակ է հետապնդում քաղաքական դավադրության իրագործումը: Նպատակաուղղված քառսային իրավիճակ է ստեղծվում, ժողովրդին օտարում են ավանդական արժեքավակարգից, ազգային դեմք ու դիմագծից, որ հեշտ կառավարելի լինի: Իսկ եկեղեցին ազգային

ամենամուր և անհաղթահարելի պատնեշն է այդ ճանապարհին, հետևաբար՝ եկեղեցու դեմ քաղաքական գործընթացում կիրառվում են նաև աղանդավորական գրոհներ ու մոտեցումներ: Ասվածը համառոտ հիմնավորեմք որոշակի փաստարկներով:

Եկեղեցու պատարագներին, անգամ Հայրապետական պատարագներին ոչ մի իշխանական պաշտոնյա չի մասնակցում: Հիշեցնենք՝ աղանդավորները չեն ընդունում եկեղեցին և իրենց հավաքավայրերն են կոչում եկեղեցի: Կա ինքնաստվածացման դրսևորում ՀՀ վարչապետի կողմից՝ Քրիստոսի հետ ինքնանույնացումով կամ ինքնահամեմատականով: Տարատեսակ աղանդների կողմից և՛ Եհովայի վկաներ, հոգեգալստականներ և այլն, քարոզվում է այն թեզը, թե իրենց հավանում են, բայց իրենց միջոցով իրականացնում է Քրիստոսի խոսքը: «Երանի՜ է ձեզ, երբ ձեզ նախատեն ու հալածեն» (Մատթ. 5.11):

ՀՀ քաղաքական իշխանությունը ժողովրդին հետևողականորեն ենթարկում է գաղափարական վերանշակման՝ կտրելով ազգային, ընտանեկան և ընկերական արժեքներից՝ հայրենիք, եկեղեցի, բանակ, դպրոց, ընտանիք, մշակույթ՝ ձևավորելով մոր արժեքահավաք, որում կան միայն սև ու սպիտակ գույներ: Ընդ որում՝ սևը իրենց գաղափարները մերժողներն են, սպիտակը՝ իրենց հետևորդներն ու համակրողները: Սև ու սպիտակի բաժանումը բնորոշ է, օրինակ, Եհովայի վկաներին, որոնք սև սատանայի աշխարհում տեղավորում են իրենց գաղափարական հակառակորդներին՝ ազգային, ավանդական, ընտանեկան արժեքաբանությունը կորոզելով: Ընդգծենք՝ Եհովայի վկաները, չընդունելով «հայրենիք» հասկացությունը և մերժելով բոլոր պետական կառույցները, դեմ են նաև բանակին և զինվորական ծառայությանը:

Միով բանիվ, աղանդները Հայաստանում նպատակ ունեն կործանել մեր ազգային հավատքը, ջլատել մեր միասնությունը և պետությունը խարխլել, ինչը և հե-

տևողականորեն կատարվում է վերջին տարիներին:

Հայ եկեղեցին գործնականում մնացել է ազգային միակ իմաստալից, որ չի կարողացել խարխլել գործող իշխանությունը: Բանակը կեղծ բարեփոխումների և պատերազմի հետևանքով տուժել է, սահմանադրությունը՝ ըստ ուզածի վերածնվել, պետական հաստատություններն՝ ըստ էության կազմաքանդվել, կրթական համակարգը՝ աղճատվել, հայրենական հողերը՝ բռնազավթվել, Հայոց ցեղասպանության պահանջատիրությունը՝ կասկածի տակ դրվել և այլն:

Կրկնում ենք՝ Սարգսրապատի հուշահամալիրի միջադեպը ՀՀ իշխանության քաղաքական-աղանդավորական ուղեգծի դրսևորումներից մեկն է միայն, այդ քաղաքականությունը հետևողականորեն իրագործվում է՝ 2018 թվականից սկսված: Ապացույց՝ 2018 թ. հուլիսի 14-ին մի խումբ մարդկանց կողմից Վայոց ձորում Ամենայն Հայոց Կաթողիկոսի՝ Գնդեվանք ուխտագնացության արգելափակումը և հարձակումը Վեհափառ Հայրապետի վրա, այդ առնչությամբ քրեական գործ անցած չհարուցելը: Այնուհետև՝ նույն նախաձեռնության անդամների կողմից օրեր շարունակ Վեհափառի գավթումը, «Հայոց եկեղեցու պատմություն» առարկայի նկատմամբ իշխանական գրոհը և ի վերջո դպրոցական ծրագրից դուրս թողնելը՝ կրոնական ազատության իրավունքի և դատընթացի բովանդակության անմատչական հարմարության քողի տակ, պետական տոների արարողակարգերին Վեհափառ Հայրապետին չհրավիրելը, 2024 թ. Կաթողիկոսի ամանորյա ուղերձի հեռարձակման արգելափակումը Հայաստանի հանրային հեռուստաընկերությամբ և այլն:

Հայ եկեղեցու հանդեպ այս սրբապղծությունն ունի նախադեպեր նաև ոչ վաղ անցյալում՝ բուլշևիկյան ապագային ժամանակներում. փակվեցին եկեղեցիներ, ձերբակալվեցին ու գնդակահարվեցին հոգևորականներ, խորեն Ա կաթողիկոս Մուրադբեկյանի դեմ խարդավանքներ մյուսվեցին, հետո անհայտ հանգամանքներում սպանեցին: Աթեիզմի ժամանակներին այսօր փոխարանում են աղանդավորական ժամանակները, բայց քաղաքական նպատակը մեկն է՝ խլացնել ժողովրդի ազգային հիշողությունը, զրկել ազգային դեմք ու դիմագծից, հայրենասիրության զգացումից ու կամքից, ժխտել պատմական հայրենիքի գոյությունը, Հայոց ցեղասպանության փոխհատուցման պահանջատիրությունը՝ դարձնելով մանկուրտ կամ աշխարհաքաղաքացի:

Այսպիսով՝ աղանդավորությունը ևս քաղաքական ուղեգիծ է ՀՀ-ում, և իշխանությունը, ժողովրդավարական կեղծ քողեր փոխելով, փորձում է թաքցնել իր ինքնությունը, խոսելով պատմական պատասխանատվությունից ու քրիստոնյա վարքից՝ կատարում է ճիշտ հակառակը:

Վերջապես՝ Սարգսրապատի միջադեպը անպատվություն է ազգային գիտակցություն ունեցող լուրաքանչյուր հայի համար:

Աստվածասեր իշխանությունը Հայաստանին, որը կկասեցնի հայրենասպանության ու ազգասպանության այս ծանր գործընթացը...

ԸՆԴՈՒՆԵԼՈՒԹՅՈՒՆՆԵՐ ՄԱՅՐ ԱԹՈՒՒ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց

Մայիսի 16-ին

Ամենայն զիտական, բարերար Նուբար Աֆեյանին



Նորին Սրբությունն իր ուրախությունը հայտնեց տիար Նուբար Աֆեյանի Հայաստան և Մայր Աթոռ Սուրբ Էջմիածին այցի առիթով՝ բարձր գնահատելով Հայաստանին ու արցախահայությանը ցուցաբերվող շարունակական զորակցության և աջակցության համար:

Հանդիպմանն Ամենայն Հայոց Կաթողիկոսը և տիար Աֆեյանն անդրադարձ կատարեցին Հայաստանում տեղ գտած զարգացումներին, հայ ժողովրդի առջև ծառացած անվտանգային մարտահրավերներին, ինչպես նաև Արցախի բռնազավթման ու հայաթափման, արցախահայության արդար իրավունքների պաշտպանության, Արցախի պատանդառված ռազ-

մաքաղաքական ղեկավարության ու ռազմագերիների ազատ արձակման և Արցախի հոգևոր-մշակութային ժառանգության պահպանության խնդիրներին:

Ջրուցակիցներն անդրադարձան նաև Հայաստան-Սփյուռք կապին, Սփյուռքի առջև ծառացած մարտահրավերներին՝ կարևորելով հայրենիքի համար դժվարին այս ժամանակներում Սփյուռքի ներուժի արդյունավետ օգտագործմանն ուղղված ծրագրերը:



Մայիսի 21-ին

Հալլեի համալսարանի պատվիրակությանը

Ամենայն Հայոց Կաթողիկոսն ընդունեց Գերմանիայի Հալլե քաղաքի Մարտին Լյութեր համալսարանի աստվածաբանության ֆակուլտետի պրոֆեսորադասախոսական պատվիրակությանը և ուսանողներին՝ գլխավորությամբ Գերմանիայի Ավետարանական եկեղեցու Արևելյան և Հարավային եկեղեցիների բաժանմունքի տնօրեն պրոֆեսոր Մարտին Էլլերթին:

Հանդիպմանը ներկա էին նաև Գերմանիայի հայոց թեմի առաջնորդ Ս. Սերովբե եպս. Իսախանյանը, Մայր Աթոռի վարչատնտեսական բաժնի տնօրեն Ս. Մուշեղ եպս. Բաբայանը և Գևորգյան հոգևոր ճեմարանի տեսուչ Ս. Շահե ծ. վրդ. Անանյանը:

Համալսարանի աստվածաբանության ֆակուլտետի ղեկան դոկտոր, պրոֆեսոր Դանիել Ցյուրանկյան Ամենայն Հայոց Կաթողիկոսին տեղեկացրեց, որ պատվիրակության այցի նպատակն է կրթական ոլորտում խորացնել համագործակցությունը ՀՀ բուհերի և Մայր Աթոռ Սուրբ Էջմիածնի Գևորգյան հոգևոր ճեմարանի հետ:

Այնուհետև Ամենայն Հայոց Կաթողիկոսն

իր օրհնությունը բերեց հյուրերին՝ բարձր գնահատելով կրթական ոլորտում նախանշվող ծրագրերն ու ձևավորվող գործակցությունը: Այս առիթով Նորին Սրբությունն ուրախությամբ ընդգծեց, որ Սուրբ Էջմիածնի միաբաններն իրենց բարձրագույն կրթությունը շարունակում են տարբեր երկրների աստվածաբանական մշանավոր համալսարաններում և քույր եկեղեցիների հոգևոր ուսումնական հաստատություններում, ինչն էլ պետք է փոխանցվողությանը և միջեկեղեցական կապերի առավել սերտացմանը: Ամենայն Հայոց Կաթողիկոսը նաև գոհունակություն հայտնեց Գերմանիայի հայոց թեմի և Գերմանիայում գործող քրիստոնեական տարբեր հարանվանությունների միջև առկա ջերմ փոխգործակցության առիթով: Վերջում Վեհափառ Հայրապետը պատասխանեց հյուրերի հարցերին, որոնք առնչվում էին Հայաստանի առջև ծառացած մարտահրավերներին, դրանց հաղթահարման ուղղությամբ Հայ եկեղեցու գործադրած ջանքերին և Մայր Աթոռի կրթական հաստատությունների գործունեությանը:

Մայիսի 22-ին

Ֆրանսահայ պատվիրակությանը

Ամենայն Հայոց Կաթողիկոսն ընդունեց ՀՀ-ի բյուրոյի ներկայացուցիչ և Հայ դատի հանձնախմբերի կենտրոնական խորհրդի նախագահ Հակոբ Տեր-Խաչատուրյանին և Ֆրանսիայի հայկական կազմակերպությունների համակարգող խորհրդի համանախագահ, ՀՀ-ի բյուրոյի անդամ Սուրադ Փափազյանի գլխավորած պատվիրակությանը: Պատվիրակության կազմում էին նաև Ֆրանսիայի Սենտի պատգամավորներ:

Հանդիպման ընթացքում Նորին Սրբությունը և պատվիրակության անդամները քննարկեցին Հայաստանի ու հայ ժողովրդի առջև ծառացած մարտահրավերներին առնչվող հարցեր՝ կարևորելով հայրենական կյանքում ազգային միասնականությունն ու ջանքերի մեկտեղումը առկա խնդիրների հաղթահարման գործում:

Իր խոսքում Հայոց Յուժկապետն անդրադարձ կատարեց Հայաստանի և արցախա-



հայության իրավունքների պաշտպանության անհրաժեշտությանը և այդ ուղղությամբ Ֆրանսիայի իշխանությունների կողմից ներդրվող ջանքերին: Այս առիթով Նորին Սրբությունն իր գնահատանքը բերեց Ֆրանսիայի Սենտի պատգամավորներին՝ շարունակական զորակցության համար:

Վերջում Վեհափառ Հայրապետը պատասխանեց պատվիրակության անդամների հարցերին, որոնք վերաբերում էին Արցախի հոգևոր-մշակութային ժառանգության պահպանության և հայ ռազմագերիների վերադարձման գործում Մայր Աթոռի կողմից տարվող աշխատանքներին:



Վերապատրաստման դասընթացներին մասնակից եկեղեցականներին

Ամենայն Հայոց Կաթողիկոսն ընդունեց վերապատրաստման դասընթացներին մասնակցող Հայաստանի և Սփյուռքի տարբեր թեմերից ժամանած եկեղեցականներին:

Վեհափառ Հայրապետը, իր օրհնությունը փոխանցելով հոգևորականներին, ընդգծեց Մայր Աթոռում կազմակերպվող վերապատրաստման դասընթացների կարևորությունը՝ իրենց հոգևոր սպասավորության առավել արդյունավորման գործում: Ամենայն Հայոց

Հայրապետը հորդորեց եկեղեցականներին լավագույնս օգտվել այս հնարավորությունից և ամբարելով մոր գիտելիքներ, զորանալով միմյանց փորձառությամբ՝ առավել մեծ նախանձախնդրությամբ շարունակել իրենց հովվական ծառայությունը: Վերջում Նորին Սրբությունը պատասխանեց քահանաներին հուզող հարցերին, որոնք վերաբերում էին հովվական ծառայությանը և հայորդիների հոգևոր կյանքի կազմակերպմանը:



Մայիսի 28-ին

ՀՀ-ի Հայ դատի հանձնախմբերի ու գրասենյակների համահայկական խորհրդաժողովի մասնակիցներին

Ամենայն Հայոց Կաթողիկոսն ընդունեց ՀՀ-ի Հայ դատի հանձնախմբերի ու գրասենյակների համահայկական խորհրդաժողովի մասնակիցներին՝ առաջնորդությամբ ՀՀ-ի բյուրոյի ներկայացուցիչ և Հայ դատի հանձնախմբերի կենտրոնական խորհրդի նախագահ Հակոբ Տեր-Խաչատուրյանի: ՀՀ-ի բյուրոյի Հայ դատի քաղաքական հարցերի գրասենյակի ղեկավար Կիրո Մանույանը, ներկայացնելով հյուրերին, Նորին Սրբությանը համապարփակ տեղեկություններ փոխանցեց խորհրդաժողովի կատարած աշխատանքների մասին:

Ողջունելով հյուրերին՝ Ամենայն Հայոց Հայրապետը կարևորեց խորհրդաժողովի աշխատանքները՝ ի խնդիր հայրենիքի և ազգի զավակների իրավունքների պաշտպանության: Նորին Սրբությունը մասնավոր անդրադարձ կատարեց հայրենիքի առջև ծառացած առկա խնդիրներին և դրանց հաղթահարման

ուղղությամբ ջանքերի մեկտեղման անհրաժեշտությանը: Հատկապես կարևորվեցին Հայաստան-Սփյուռք կապերի սերտացումը և համագգային ներուժի ծառայեցումը հանուն հայրենիքի զորացման և ապահով կյանքի կերտման: Նորին Սրբությունն իր գնահատանքը հայտնեց ՀՀ-ի Հայ դատի գրասենյակին Հայոց ցեղասպանության ճանաչման և դատապարտման ուղղությամբ գործադրվող ջանքերի, արցախահայերի արդար իրավունքների բարձրաձայնման ու հետապնդման և հայրենամարտի ու ազգօգուտ ալ իրագործումների համար: Վերջում Վեհափառ Հայրապետը պատասխանեց հյուրերի հարցերին, որոնք վերաբերում էին Արցախի հոգևոր-մշակութային ժառանգության պահպանության խնդիրներին, հայ ռազմագերիների վերադարձման գործում Մայր Աթոռի կողմից տարվող աշխատանքներին և միջեկեղեցական հարաբերություններին:

Ամենայն Հայոց Կաթողիկոսը ցավակցազիր է հղել Իրանի հոգևոր առաջնորդին

Մայիսի 20-ին Ն. Ս. Օ. Ս. Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսը ցավակցական նամակ է հղել Իրանի Իսլամական հեղափոխության առաջնորդ Այաթոլլա Մեյեդի Ալի Ջոսեյնի համեմատելի ուղղաթիռի վթարի հետևանքով Իրանի Իսլամական Հանրապետության նախագահ Սեյիդ Էբրահիմ Ռաիսիի, ԱԳ նախարար Ջոսեյն Ամիր Աբդոլլահյանի և ուղեկցող պաշտոնատար անձանց ողբերգական մահվան կապակցությամբ:

Նորին Սրբությունը, հանուն Գերագույն հոգևոր խորհրդի և Մայր Աթոռ Սուրբ Էջմիածնի միաբանության, վշտակցություն է հայտնել զոհերի սգակիր ընտանիքներին և Իրանի ժողովրդին՝ հայցելով, որ Բարձրալու զորավոր լինի Իրանի Իսլամական Հանրապետությանը հաղթահարելու դժվարին փորձությունը:

Կատարվեց հոգեհանգիստ բնական աղետի հետևանքով զոհ գնացած հայորդիների համար

Մայիսի 27-ին, Ն. Ս. Օ. Ս. Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսի հանդիսապետությամբ, Սուրբ Հովհաննես Մկրտչի և Սուրբ Վարդան մատուռ-մկրտարանում կատարվեց հոգեհանգստյան կարգ Լուռու և Տավուշի մարզերում բնական աղետի հետևանքով զոհ գնացած հայորդիների համար:

Սուրբ Էջմիածնի միաբանությունը և ներկա հավատացյալ ժողովուրդն աղոթք բարձրացրին անմեղ զոհերի հոգիների հանգստության, ինչպես նաև աղետից տուժածների և վիրավորների շուտափույթ ապաքինման համար:



Տոնախմբություններ և հիշատակություններ Մայր Աթոռում Տոնախմբվեց Սուրբ Հռիփսիմյանց կույսերի հիշատակը

Մայիսի 27-ին Հայաստանյայց Առաքելական Սուրբ Եկեղեցին տոնախմբեց Սուրբ Հռիփսիմյանց կույսերի հիշատակը: Տոնական այդ օրը նաև Ս. Հռիփսիմե վանքի ուխտի օրն է, երբ Ն. Ս. Օ. Ս. Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսի օրհնությամբ Մայր Աթոռ Սուրբ Էջմիածնից Ս. Հռիփսիմե վանք է տարվում սրբուհու մասունքն ամփոփող Աջը:

Առավոտյան Մայր Աթոռ Սուրբ Էջմիածնից եկեղեցականների թափորը՝ հավատացյալների ուղեկցությամբ, Էջմիածնի հայորդյաց տան սաների թմբուկների զարկերի ներքո, շարժվեց դեպի Սուրբ Հռիփսիմե վանք՝ տանելով սուրբ Հռիփսիմեի մասունքները: Սուրբ Գրիգոր

Լուսավորչի կամարի առջև Ամենայն Հայոց Հայրապետը, սրբազան Աջով օրհնելով հոգևոր դասին և ներկա բարեպաշտ ժողովրդին, այն փոխանցեց Մայր Աթոռի լուսարարապետի պաշտոնակատար Ս. Հարություն վրդ. Կիրակոսյանին: Սուրբ Հռիփսիմե վանքի առջև թափորը դիմավորեցին վանքի հոգևոր սպասավորները և տարբեր վայրերից ժամանած բազում ուխտավորներ՝ Մայր Աթոռ Սուրբ Էջմիածնի վանորդից տեսուչ Ս. Արտակ եպս. Տիգրանյանի գլխավորությամբ: Տոնի առիթով վանքում մատուցվեց սուրբ և անմահ պատարագ: Պատարագիցն էր Մայր Աթոռի միաբան Ս. Ոսկան արք. Ոսկանյանը: Հայր սուրբը, անդրադառնալով օրվա խորհրդին, ի մաս-



մավորի նշեց. «Ս. Հռիփսիմյանց չուրացան Քրիստոսին, երկնքի արքայությունը չփոխեցին թագավորական փառքի հետ՝ գերադասելով Տիրոջ սերն ու նահատակությունը: Սրբուհին իր օրհնակով

մեզ ցույց է տալիս, որ Քրիստոսին խաչակից լինելը ոչ թե դառնացնում է մեր կյանքը, այլ մեր կյանքի դառնություններն է քաղցրացնում և առաջնորդում է հաղթահարելու մեր կյանքի փորձությունները»:




իր քարոզի վերջում հայր Ոսկանը հորդորեց հավատավոր հայորդիներին Ս. Հռիփսիմյանց բարեխոսությամբ քաջալերվել ու չընկրկել փորձությունների առաջ և հավատարիմ մնալ Քրիստոսին:

Տոնախմբվեց Սուրբ Գայանյանց կույսերի հիշատակը

Մայիսի 28-ին Հայաստանյայց Առաքելական Սուրբ Եկեղեցին տոնեց Սուրբ Գայանյանց կույսերի հիշատակը, որն այս տարի համընկել է Հանրապետության տոնին:

Մայիսի 27-ից հունիսի 2-ը Հայոց Եկեղեցին տոնախմբում է Արարատյան շաբաթը: Այն նշանավորվում է Հռիփսիմյանց և Գայանյանց կույսերի, Հովհաննես Կարապետի հիշատակությամբ, ինչպես նաև Լուսավորչի՝ վիրապից ելնելու և Կաթողիկե Սուրբ Էջմիածնի տոներով: Բերկրառատ տոնի առիթով առավոտյան Վեհարանից եկեղեցականների հանդիսավոր թափորն առաջնորդվեց դեպի Սուրբ Գայանե վանք: Այն մինչև Սուրբ Գրիգոր Լուսավորչի կամար գլխավորեց Ն. Ս. Օ. Ս. Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսը՝ նահատակ սրբուհու մասունքն ամփոփող Աջով օրհնելով բարեպաշտ ժողովրդին: Այնուհետև Վեհափառ Հայրապետը մասունքակիր Աջը փոխանցեց Մայր Աթոռի



լուսարարապետի պաշտոնակատար Ս. Հարություն վրդ. Կիրակոսյանին:

Սուրբ Գայանե վանքի առջև թափորը դիմավորեցին Մայր Աթոռի վանորդից տեսուչ Ս. Արտակ եպս. Տիգրանյանը, վանքի հոգևոր սպասավորներն ու բազմաթիվ հավատավոր հայորդիներ:

Օրվա խորհրդի առիթով Սուրբ Գայանե վանքում մատուցվեց

սուրբ և անմահ պատարագ: Պատարագիցն էր Սուրբ Գայանե վանքի վանահայր Ս. Մատթեոս վրդ. Պողոսյանը:

Իր քարոզում հայր սուրբը, անդրադառնալով Սուրբ Գայանյանց կույսերի կյանքին և նահատակության պատմությանը, ընդգծեց, որ նրանք իրենց անբասիր մաքրությամբ, անսասան հավատքով, առաքինի վարքով, քաջությամբ ու

համարձակությամբ, առ Աստված տոգորված սիրով դարձան Տիրոջ երկնավոր արքայության ընտրյալները:

«Այսօր, սիրելիներ, մայիսի 28-ն է՝ մեր պատմության հերոսական էջերից մեկը, և գեղեցիկ զուգահեռությամբ Գայանյանց կույսերի տոնը համընկել է Սարգսյանի հերոսամարտի հաղթական օրվա հետ: Այսօր էլ

ծանր փորձությունների առաջ է կանգնած մեր երկիրը: Սակայն վստահ եմք, որ քրիստոնեական մեր տիրավանդ հավատքով, Տիրոջ զորակցությամբ հաղթահարելու ենք այս դժվարին ժամանակները ևս», - ասաց հայր Մատթեոսը՝ հայցելով Սուրբ Գայանյանց և Հռիփսիմյանց բարեխոսությունը Եկեղեցու պայծառության, հայրենիքի խաղաղության ու ապահովության համար:

Սուրբ պատարագի ընթացքում, Հանրապետության տոնի առիթով, Ամենայն Հայոց Կաթողիկոսի հանդիսապետությամբ կատարվեց Հանրապետական մաղթանք:

Եկեղեցականաց դասը ու ներկա ժողովուրդն աղոթք բարձրացրին առ Աստված Հայաստանի Հանրապետության անսասանության, խաղաղ, բարօր և անվտանգ կյանքի համար: Մաղթանքի ավարտին Նորին Սրբությունը Պատրիարքի աղոթքով և Ս. Գայանեի մասունքակիր Աջով օրհնեց հավատավոր հայորդիներին:

Սուրբ Հովհաննես Կարապետի մասունքը տարվել է Շողակաթ վանք



Մայիսի 30-ին Հայաստանյայց Առաքելական Սուրբ Եկեղեցին նշեց Սուրբ Հովհաննես Կարապետի և Սուրբ Աթանասիոս եպիսկոպոսի տոնը, որը նաև Էջմիածնի Սուրբ Շողակաթ վանքի ուխտի օրն է:

Սուրբ Հովհաննես Մկրտչի մասունքն ամփոփող խաչ-մասունքաբանն առավոտյան Մայր Աթոռից Սուրբ Շողակաթ վանք տարվեց եկեղեցականների հանդիսավոր թափորով: Թափորը մինչև Սուրբ Գրիգոր Լուսավորչի կամար գլխա-

վորեց Ն. Ս. Օ. Ս. Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսը՝ մեծագույն սրբի մասունքաբանով օրհնելով բարեպաշտ ժողովրդին: Այնուհետև սրբազան մասունքը Նորին Սրբությունը փոխանցեց Մայր Աթոռի քրիստոնեական դաստիարակության կենտրոնի տնօրեն Ս. Զաքարիա Ժ. վրդ. Բաղուսյանին: Սուրբ Շողակաթ վանքի առջև թափորը դիմավորեցին բազմաթիվ ուխտավորներ՝ Մայր Աթոռի վանորդից տեսուչ Ս. Արտակ եպս.

Տիգրանյանի գլխավորությամբ: Տոնի կապակցությամբ վանքում մատուցվեց սուրբ պատարագ: Պատարագիցն էր Շողակաթ վանքի վանահայր Ս. Արիս արք. Տոնյանը: Սրբազան արարողության ավարտին Ս. Արտակ եպս. Տիգրանյանը Ս. Հովհաննես Մկրտչի մասունքակիր խաչով օրհնեց հավատացյալ ժողովրդին:

Լրատվական նյութերը՝
Մայր Աթոռ Սուրբ Էջմիածնի
տեղեկատվական համակարգի

«Հոգ չէ, թե կգոհվեմ հազարամյա տաճարի շենքից...»

Սուրբ Էջմիածնի և Կաթողիկոս Գևորգ Ե Սուրենյանցի դերը 1918 թվականի մայիսին

Գևորգ Ե Սուրենյանց Ամենայն Հայոց Կաթողիկոսի անունը հայոց պատմության մեջ առաջին հերթին կապվում է 1918 թ. մայիսյան հերոսամարտերի հետ։ Մինչ այդ և դրանից հետո էլ Վեհափառ ազգային օգտաշահ գործունեություն ծավալեց, սակայն հատկապես Սարգստապետը դարձավ նրա կենսագրության հատկորոշիչը։ Ինչհիմամբ, որովհետև այդ ժամանակ, ինչպես այսօր, վճռվում էր հայ ժողովրդի և Հայաստանի լիակատարության հարցը, և Վեհափառ հայրապետն Էջմիածինը չլքելու իր անհողողող կեցվածքով, դիմադրության անսահման վճռականությամբ բեկում մտցրեց հայկական հուսալքված գործերի շարքերում՝ սխրագործության առաջնորդելով հազարավորների։ 1918 թ. մայիսյան կենաց ու մահու ճակատամարտերի արդյունքում վճռվեց մեր ազգային լիակատար խնդիրը, ավելին՝ 600-ամյա կոթողից հետո վերականգնվեց հայկական պետականությունը։

Ինչպիսիք էր այդ ժամանակ իրավիճակը Հայաստանում, և ինչ նշանակություն ունեցավ Ս. Էջմիածինը՝ ի դեմս Կաթողիկոսի և հոգևորականության։

Խախտելով 1917-ի դեկտեմբերի 5-ի Երզնկայի զինադադարը՝ Թուրքիան շուտով վերսկսեց ռազմական գործողությունները՝ գրավելով Կարինը, Կարսը, Սարիղամիշը ու Ալեքսանդրապոլը։ Օսմանյան զորամասերը, անցնելով Ախուրյանն ու Արաքսը, գրոհեցին և Սարգստապետի ուղղությամբ։ Ներսիս կոնվենտի հրահրելով՝ թուրքական զորքերի առաջխաղացման օժանդակում էին Երևանի մահաճգի մահմեդականները՝ թուրքերը, թաթարները, քրդերը։ Արարատյան դաշտը 1918 թ. մայիսին շրջապատված էր թշնամիներով։

Ռուսաստանում 1917-ի փետրվարի հեղափոխության հետևանքով էր թուրքերի ներխուժումն Արարատյան դաշտ տեղի ունեցել՝ Նիկոլայ Երկրորդ ցարի գահընկեցության և բոլշևիկյան իշխանության քաղաքականության արդյունքում։ Բոլշևիկյան կառավարության հրահանգով՝ ռուսական զորքերը լքեցին կովկասյան ռազմաճակատը՝ նաև Արևմտահայաստանը՝ թողնելով ռազմական վիթխարի պահեստներ։ Արդեն 1918-ի հունվարի վերջերին կովկասյան ճակատը հիմնականում դատարկված էր ռուսական զորքերից։ Այդ

գործընթացը, բոլշևիկների պրոթուրեքական քաղաքականությունը ընկճեցին հայկական զորքերի դիմադրողականությունը, բացի այդ՝ հայկական զորքերի շարքերը բարոյալքվում էին զանազան ապատեղեկություններով, որոնցից մեկն այն էր, թե առաջացող թուրքասկյարն այլևս հայ ժողովրդի բարեկամն է, պետք չէ կրակել նրա վրա։

Կարսի բերդի պաշտպանության համար մոտ վեց հազար հայազգի զինվոր կար, բացի այդ՝ բերդի հրամանատար Դեհի տրամադրության տակ կային մոտ հազար միավոր հրանոթ և տարբեր տեսակի զենքեր, սակայն Կարսը հանձնվեց առանց դիմադրության, հազարավոր հայեր խուճապահար փախան դեպի Երևանի մահաճգ, և ապրիլի 25-ին օսմանյան երրորդ բանակն առանց կռվի մտավ հայկական բերդաքաղաք։ Թուրքական զորքերը կանգ չէին առնում՝ խախտելով պաշտոնական բոլոր պայմանավորվածությունները։ Մայիսի 15-ին գրավվում է նաև Ալեքսանդրապոլը։ Ալեքսանդրապոլի անկումից հետո հայկական զորքերի մի մասը կռիվներով մահաճեցում է Երևանի ուղղությամբ՝ մայիսի 19-ին հասնելով Սարգստապետ։

Երևանում համընդհանուր խուճապ էր, բոլոր ճանապարհները փակ էին, իրավիճակն անելանելի էր, դիմադրությունն անհնար էր թվում։ Հայկական կորպուսի հրամանատարությունը հակված էր Երևանն առանց դիմադրության հանձնել թուրքերին



և պաշտպանություն կազմակերպել Սևանա լճի ափին։ Սակայն Երևանի մահաճգի ղեկավարությունը՝ Արամ Մանուկյանի ու զորահրամանատար Դրաստամատ Կանայանի գլխավորությամբ, որոշում է թուրքերի առաջընթացն Արարատյան դաշտավայրում կանխել։ Արամ Մանուկյանի դիմումը երևանցիներին շատ որոշակի էր. «Մենակ ենք ու պիտի ապավինենք միայն մեր ուժերին»։

Հայկական զորքերի երևանյան զորախմբի հրամանատար զեմերալ Մովսես Սիլիկյանը, որ իր հրամանատարական կետը հաստատել էր Էջմիածնի Գևորգյան հոգևոր ծեմարանում, Երևանի ապագա պարետ Արշավիր Շահխաթունու ուղեկցությամբ մայիսի 19-ին ներկայանում է Կաթողիկոս Գևորգ Ե Սուրենյանցին և նրան առաջարկում անվտանգության համար տեղափոխվել Բջնի, Բյուրական կամ Սևան։ Կաթողիկոսը կարակամապես հրաժարվում է։ Երկու օր անց՝ մայիսի 21-ին, Արամ Մանուկյանը, Շահխաթունին և Պողոս Բեկ-Փիրումյանն են Երևանից ժամանում Մայր Աթոռ և կրկին հորդորում Վեհափառին՝ միայն տեղափոխվել Երևան, ապա՝ Սևան։

→ էջ 6

Տաթևի վանքը՝ պատմաքաղաքական իրադարձությունների կենտրոն


Պատմության ընթացքում Տաթևի վանքը եղել է ինչպես Սյունիքի հոգևոր-մշակութային, այնպես էլ քաղաքական կյանքի ակնառվոր կենտրոնը։ Այսպես՝ Ղուկաս Սեբաստացին հաղորդում է, թե Դավիթ բեկը Սյունյաց աշխարհի հասավ Տիրոջ 1722, հայոց 1171 թվականին ու բանակեց Սիսական գավառի սահմաններում Դավիթ ինքը ազնվական էր, բարեպաշտ, արդարակրթ, գրագետ, արիասիրտ, լայնախոհ, խոսքով ու գործով ուժեղ, ազգի բարօրության նախաձեռնողի և աններող՝ նրա թշնամիների հանդեպ։ Իր նման էին և նրա բոլոր հետևորդները։

Դավիթ բանակում է Հայրաշեն կամ Շինուհայր կոչվող ամրոցում։ Եվ իր մոտ կանգնելով Տաթևի առաջնորդին՝ պատմեց նրան, թե ինչ գործով, ինչ նպատակով է եկել և ասում է՝ իսպառ ջնջելու ենք բոլոր թշնամիներին։

Այս ժամանակ Տաթևում մի մեկը կար ուրացող, որ առաջ կոչվում էր Դավիթ, բայց հետո, երբ հավատը փոխեց, ինքը և ամբողջ ընտանիքը, վերակոչվեց Բաղրի, և նրա որդիները դարձան շահողույի։ Սա երբ լսում է Դավիթ գալը, Տաթևի տղամարդկանց հավաքում, ամրություններ է շինում և պատրաստվում է պատերազմել Դավիթ դեմ։

Դավիթ բեկը գալիս, հարձակվում է նրա վրա, պաշարում ամրությունները և երկու օր հետո նրան բռնում, տանում է Շինուհայր և հրամայում տասներկու օր եկեղեցում բոլորի ներկայությամբ բարձր ձայնով ասել առածի խոսքը. «Լնյս Լուսավորչի հավատին, վայ՛ ուրացողին»։

Այնուհետև Դավիթ բեկը հատում է նրա գլուխը։ Ապա սուրհանդակներ է ուղարկում Հայիծոր, տեղ Ավետիսի և նրա աներոջ՝ մեկը Փարսադանի մոտ, և ասում՝



եկեք միաբանվեք մեզ հետ, որ վտարենք բոլոր թուրքերին երկրից։ Ահա այսպես արդար պատժի է արժանանում ուրացող ու դավաճան Բաղրին։

Նորագույն ժամանակներում ևս Տաթևի վանքը գտնվում էր Սյունյաց ներքաղաքական կյանքի կիզակետում՝ շնորհիվ Տաթևի վանքի վանահայր Հովհաննես Տեր-Գրիգորյանի։ 1918 թ. օգոստոսի 2-ին Տաթևի վանքին է մոտենում Չորավար Անդրանիկն իր հեծյալներով ու գաղթականների խմբով։ Վանքի հոգևորականները, վանահոր գլխավորությամբ, Անդրանիկին դիմավորում են վանական համալիրի մուտքի մոտ, ապա Չորավարի պատվին ճաշկերույթ են կազմակերպում։ Չորավարը և սպայական զինվորներն են վանքում, իսկ զինվորներն ու գաղթականությունը՝ վանական համալիրի ընդարձակ տարածքում։ Հաջորդ օրը՝ օգոստոսի 3-ին, կեսօրից առաջ, Անդրանիկն իր հեծելազորի հետ Տաթևից ճանապարհվում է դեպի Չանգեզուր գավառի վարչական կենտրոն Գորիս։

1920 թ. դեկտեմբերի 25-ին Տաթևի վանքում գումարվում է Համազանգեզուրյան առաջին համագումարը, որը վճռում է «Համագեզուրը յայտարարել ժամանակաւոր ինք-

նաւար, մնալով անկախ մինչև քաղաքական հնարաւորութիւն կունենայ միաձայն իր մայր երկրի՝ Հայաստանի հետ»։ Ինքնավար Սյունիք հռչակած համագումարը միաձայն որոշեց ընտրել Նժդեհին որպես «Սիւնեաց պատմական իր բախտը յանձնելու նրան»։

Նժդեհին առաջվա պես վճռական էր համարում ժողովրդի բարոյական ոգու ամրացումը, ուստի գրեց սյունեցիներին ուղղված, յոթ պատվիրաններ պարունակող մի պատգամ, որն այդ օրերին կարդում էին Սյունիքի եկեղեցիներում, դպրոցներում, զորանոցներում, ռազմաճակատներում, գյուղի թե քաղաքի ամեն մի հարկի տակ։ Ահա այդ պատվիրանները.

1. «Երբեք առանց Սյունիքի և Արցախի։ Առանց Հայաստանի աշխարհագրական այդ ուժեղ ողնաշարի, մեր ամբողջական հայրենիքը գոյություն ունենալ չի կարող։
2. Լեռներիդ վրա, լեռներիդ մեջ է քո փրկությունը։ Արդ, տաճարներիդ մեջ, խաչներիդ կողքին բարձրացուր մի-մի ժայռ և՛ պաշտե, և՛ երկրպագե, որ չթուլանա փրկարար պաշտամունքդ դեպի լեռները։
3. Սպարտա։ Քո երկիրը, որպես մոր Սպարտա կարող է գոյություն ունենալ տխուր Արևելքում։ Զգտիր, կարող ես և պիտի դառնաս։
4. Երբեք անգն։ Թող նախ հարկաւորները իրենց սրերը խոփերի և միզակները օթոցների վերածեն։
5. Եվ ոչ մի ընչազուրկ՝ քո հողի վրա։ Խեղճերի արցունքից ու թույլ-

երի անարիությունից են քանդվում հայրենիքները։ Բոլոր որդիներդ անկարող և արի։

6. Մի ժողովուրդ — մի ընտանիք։ Ազգերի մեջ գուցե և միայն դու իրավունք չունես ներքուստ պառակտված լինելու։
7. Եղի՛ր ուժեղ, էլի ուժեղ, և միշտ ուժեղ։ Ժողովուրդները վերջիվերջո տեր են մնում ոչ թե նրան, ինչ որ նրանց տրվում է, ինչ որ մուծում են, այլ միայն նրան, ինչ որ արժանի են, ինչ որ իրենց սեփական ուժերով ապահովել են կարողանում։

1921 թ. փետրվարյան ապստամբության պարտությունից հետո Սյունիք մահաճեցած Հայրենիքի փրկության կոմիտեն ապրիլի 21-ին ինքնալուծարվում է Տաթևի վանքում։

1921 թ. ապրիլի 27-ին Տաթևի վանքում գումարվում է Համազանգեզուրյան երկրորդ համագումարը, որը ինքնավար Սյունիքը հռչակում է Լեռնահայաստան։ Պատգամավորների ելույթներից հետո ձայների մեծամասնությամբ համագումարը որոշում է.

1. «Ինքնավար Լեռնաշխարհ Ազատ Սյունիքը» հայտարարել անկախ պետություն և այն վերանվանել Լեռնահայաստան, որի մեջ մտնում են Չանգեզուրը, Վայոց ձորը (Դարալագյազ) և Լեռնային Ղարաբաղը։ Գորիս քաղաքը համարել Լեռնահայաստանի մայրաքաղաք։
2. Քանի որ նորաստեղծ պետությունն ազդարարվում էր հանրապետական և ժողովրդավարական, ուստի այն պետք է ունենար համապատասխան հաստատություններ՝ պառլամենտ, նախարարների խորհուրդ և ինքնիշխանությանը բնորոշ մյուս հատկանիշները։
3. Համագումարը հայտարարել Լեռնահայաստանի վարչապետություն՝ նախարարների խորհուրդ։ Կառավարության անդամներին հետապնդող անվանել նախարարներ։

4. Վարչապետ ընտրել Սպարապետին՝ նրան վերապահելով նոր կառավարության կազմի ընտրությունը։

Լեռնահայաստանի վարչապետ է ընտրվում Նժդեհի՝ միաժամանակ ստանալով զորավարի աստիճան և պարգևատրվելով «խուսափյալ արծիվ» երկաթե շքանշանով։

Փետրվարյան ապստամբության պարտությունից և Երևանից հեռանալուց հետո Սյունիքում գործում են երկու՝ Ս. Վրացյանի գլխավորած Հայաստանի Հանրապետության և Գարեգին Նժդեհի գլխավորած Լեռնահայաստանի կառավարությունները։ Նժդեհը Լեռնահայաստանի հռչակումը պայմանավորում էր ոչ թե Սյունիքի անկախության, այլ անվտանգության երկարաձգման, ուժերի վերախմբավորման անհրաժեշտությամբ։ Սակայն կարևորելով ուժերի միավորման հրամայականը՝ 1921 թ. հունիսի 1-ին երկու կառավարությունները միավորվում են, Լեռնահայաստանը հռչակվում է Հայաստան, վարչապետ է ընտրվում Ս. Վրացյանը, իսկ զինված ուժերի գլխավոր հրամանատար՝ Գ. Նժդեհը։ 1921 թ. հունիսի 26-ին Ս. Վրացյանին ուղղված գրության մեջ Նժդեհը գրում է. «Քանի դեռ ինքնավար Լեռնահայաստան կա՝ Նախիջևանն ու Շարուրը չեն կարող կցվել Ադրբեջանին, հայկական Ղարաբաղը չի ադրբեջանաճա՛ն»։

Թեև հետագայում Սյունիքը խորհրդայնացվում է, բայց մնում է հայկական ու ընդգրկվում ՀԽՍՀ կազմում։ Իսկ հեռանալուց առաջ Նժդեհը սյունեցիներին հայտարարում է, որ ինքն ընդմիշտ չի հեռանում Լեռնահայաստանից և պիտի վերադառնա, եթե Երևանի փոխարեն Բաքուն լինի Սյունիքի հողի վրա ոտք դնողը։

Արման ՄԱՆՈՒՅԱՆ, պ. գ. թ.

«Հոգ չէ, թե կգոհվեմ հազարամյա տաճարի շենքի...»

← էջ 5

Սակայն անհողողող Վեհափառը մերժում է նրանց՝ ասելով. «Եթե հայ զորքն ու ժողովուրդը ի վիճակի չեն պաշտպանելու այս սուրբ վայրերը, ապա ես ինքս մենակ սուր կվերցնեմ և կընկնեմ Մայր տաճարի գավթում, բայց չեմ հեռանա մեր պապերից ավանդ մնացած Մայր Աթոռից...»:

Այնուհետև Ամենայն Հայոց Կաթողիկոսը կարգադրում է օր ու գիշեր հնչեցնել Մայր տաճարի զանգակատան ղողանջները՝ ահազանգելու տազնապալի պահը և ժողովրդին ի զեն կոչելու: Դիմելով միաբանության անդամներին՝ Վեհափառն ասում է. «Մեզ խորհուրդ են տալիս լքել Մայր Աթոռը և հեռանալ Սուրբ Էջմիածնից: Ես ինքս մնում եմ, ձեզանից ովքեր ցանկանում են գնալ, ազատ են, կարող են գնալ»: Միաբանները ոչ միայն չեն հեռանում, այլև ավելի են ոգեշնչվում Վեհափառին՝ պատրաստակամություն հայտնելով ռազմադաշտ մեկնելու: Կաթողիկոսն իջնում է Վեհարանից և Մայր տաճարի իջման Սուրբ Սեղանի առաջ արտասովալի աչքերով երկար աղոթում: Հետագա օրերի ընթացքում գիշեր-ցերեկ ղողանջում են Հայոց աշխարհի եկեղեցական բոլոր զանգերը՝ պայքարի դաշտ հրավիրելով բոլորին:

Ահավասիկ Կաթողիկոս Գևորգ Զինգերորդի կոչը հայ ժողովրդին. «Ա՛զգ հայոց, թուրքը՝ մեր բանական հոտի դարավոր թշնամին, նվաճել է Ալեքսանդրապոլը, շարժվում է դեպի սիրտը մեր երկրի, մեր հավատի, մեր կենսագրության: Գալիս է Արարատյան երկրի վրա:

Թուրքը, կոտորած ու ավեր փռելով, գալիս է, և մեր գորապետներն էլ այլ ելք չեն գտնում այդ աղետից, քան հայոց հայրապետին փախուստի մղել: Նրանք ինձ առաջարկում են ոսոխի բերանին թողնել Մայր Աթոռ Սրբ. Էջմիածինը, մեր սրբարանը, հայ ժողովրդի վերջին կոտորը:

Ո՛չ և ո՛չ: Հազար անգամ ո՛չ: Ես չեմ լքի մեր սուրբ նախնիներից ավանդ մնացած Մայր Աթոռը: Եթե հայ ժողովուրդը չի կարող թշնամու առաջխաղացումը կասեցնել, եթե ի զորու չէ փրկելու մեր սրբությունները, ապա ես ինքս սուր կվերցնեմ և կընկնեմ Մայր Տաճարի գավթում, բայց չեմ հեռանա պապերից ավանդ մնացած Սուրբ աթոռից:

Իսկ եթե եկել է վերջը, ապա այն ինչն էլ չընդունենք պատվով ու քաջությամբ, և ո՛չ թե ողորմելի ստրուկի պես ոսոխի առաջ սողալով: Մեր պատմության անցյալ դարերը լիքն են քաջությամբ ներկված նահատակների արյամբ: Դրանով չի սպառվել մեր արյունը և ուժը: Դաքեր շարունակ հայ ազգն ապրել է

ինքնության համար պայքարելով: Դրա համար է, որ զանգվածային կոտորածներով հարուստ մեր կենսագրությունը չի ունեցել և չի ունենա վերջին վերջակետ:

Ուրեմն էլ ինչո՞ւ ազգովին չբարձրանանք թշնամու դեմ, որը գալիս է ծարավ մեր վերջին արյունին»:

Այսպես՝ Գևորգ Ե Սուրենյանց Կաթողիկոսը ոչ միայն չի լքում Ս. Էջմիածինը, այլև ժողովրդի ներկայությամբ ուխտ է անում՝ ամձամբ պաշտպանելու Մայր Աթոռը: Կաթողիկոսի կեցվածքը խոր ազդեցություն է գործում բոլորի վրա: Առկա պայմաններում, երբ քաղաքական կամք չկար դիմադրելու ոսոխին, և իշխում էր հանձնվողականության տրամադրությունը, Ս. Էջմիածինն արթնացնում է ազգային դիմադարձ ոգին: Շուրջ հինգ հարյուր հոգևորական է մեկնում ռազմադաշտ: Մայր Աթոռի հոգևորականները կենաց ու մահու ճակատամարտերում իրենց ամբիջական մասնակցությամբ քաջալերում էին հայ կամավորներին: Պահպանվել է պատմական պահի լուսանկարը, երբ Վեհափառն օրհնում է կամավորական զորքերին:

Ինքնապաշտպանական պայքարը գլխավորում են Էջմիածնի ճեմարանի տեսուչ Գարեգին Եպիսկոպոս Զովսեփյանը, Էրզրումի հոգևոր առաջնորդ Չավեն Եպս. Մահտեսի-Բաբայանը, վարդապետներ Եզնիկն ու Թադևոսը, տեր Զովհաննես քին. Տեր-Մկրտչյանը:

Գարեգին Եպս. Զովսեփյանը գլխավորում էր դարաբաղցիներից բաղկացած հինգերորդ զուգը՝ «Մահապարտներ» անունով: Սինոն Կրացյանը նրան համեմատել է Ղևոնդ Երեցի հետ. «Էջմիածնի միաբանը շրջում էր մի մասից մյուսը և իր ծառերով բարձրացնում զորքերի տրամադրությունը: Կրկնվում էին Վարդանանց պատմական օրերը...»:

Բաշ-Ապարանի ճակատամարտում տեր Տաճատ և տեր Զովհաննես քահանաների առաջնորդած աշխարհագրային ջոկատներն առաջինը դիմագրավեցին թուրքական զորքերի հարձակումներին: Սինն և աշխարհագրայինների օգնության հասնելը՝ տեր Տաճատի ջոկատը՝ 40–50 մարդ, մարտնչեց թուրքական առաջապահ զինվորների դեմ՝ կասեցնելով նրանց առաջխաղացումը դեպի Երևան:

Դարաբիլիսայի ճակատամարտում Հայկական զինված ուժերին աջակցում էին կամավորական շարժման հայտնի ղեկավարներից Մեսրոպ արք. Տեր-Մովսիսյանը, Դարպաս գյուղի քահանան՝ տեր Կոմիտաս Սարգսյանը: Նրանք, համախմբելով մի քանի գյուղերի բնակիչներին, ամուր դիմադրություն ցույց տվեցին թշնամուն:



Գևորգ 5-րդ Վեհափառն օրհնում է կամավորներին, 1918 թ.

Գևորգ Զինգերորդ Սուրենյանց Ամենայն Հայոց հայրապետի կեցվածքի, Արամ Մանուկյանի առաջնորդական տաղանդի, Դրոյի անվեհերության և ողջ ժողովրդի զոհողության շնորհիվ հնարավոր եղավ թուրքական գրոհը կանգնեցնել Սարդարապատում, ապա՝ Բաշ-Ապարանում: Թուրքերը ոչ միայն չկարողացան Սարդարապատից առաջ շարժվել, այլև տալով երեք հազարից ավելի զոհ՝ նահանջեցին Ալեքսանդրապոլ:

Մայիսի 28-ին Թիֆլիսում՝ հայ մեծահարուստ նավթարդյունաբերող Միքայել Արամյանի տանը, Հայոց ազգային խորհուրդը հռչակում է Հայաստանի Հանրապետությունը:

Սարդարապատի և Բաշ-Ապարանի հաղթանակներով ոգևորված հայկական զորքերն առաջ էին շարժվում դեպի Ալեքսանդրապոլ՝ ազատագրելու քաղաքը: Մայիսի 29-ին գեներալ Մովսես Սիլիկյանը կոչ է ուղղում հայերին. «Մենք պետք է թուրքերից հետ վերցնենք Ալեքսանդրապոլը: Նրանք պահանջում են Ախալքալաքի, Ալեքսանդրապոլի ու Էջմիածնի գավառները Մայր տաճարի հետ միասին, երևանի նահանգի մեծ մասն ու Նախիջևանը: Կարո՞ղ ենք թույլ տալ նման վիրավորանք: Երբեք, հայ ժողովուրդ, դու չպիտի թույլ տաս այդպիսի անարգանք: Եվ այդ անարգանքը տեղի չի ունենա, եթե մենք հասնենք մինչև Ալեքսանդրապոլ: Դեպի՞ գեներ բոլորդ, դեպի՞ Ալեքսանդրապոլ»: Սակայն երբ հայկական զորքերը մոտենում էին Ալեքսանդրապոլին, Թովմաս Նազարբեկյանը կանգ առնելու հրաման տվեց, քանի որ Ազգային խորհուրդը տեղեկացրել էր, որ Բաթումում զինադադարի համաձայնություն է կայացվել, հաշտության բանակցություններ են ընթանում: Ձորերի առաջընթացի դադարեցման պաշտոնական որոշումը կայացվել էր այն գիտակցությամբ, որ զինապահեստները գրեթե դա-

տարկ են, թուրքական զորքերը նոր համալրումներ են ունենում, և հնարավոր պարտությունը կլինի վերջնական կորուստ:

Մայիսի 30-ին սկսված բանակցություններն ավարտվում են հունիսի 4-ին. Հայաստանի նորանկախ հանրապետությունը կնքում է առաջին միջազգային պայմանագիրը՝ հաշտության և բարեկամության դաշնագիրը Օսմանյան կայսրության հետ: Բաթումի պայմանագիրը ռազմական գերաշրջություն ունեցող Թուրքիայի կողմից պարտադրված ակտ էր՝ բաղկացած 14 հոդվածից: Առաջին հոդվածով հռչակվում էր «խաղաղություն և հարատև բարեկամություն» երկու կառավարությունների միջև: 2-րդ հոդվածով որոշվում էր Օսմանյան կայսրության և Վրաստանի, Հայաստանի ու Ադրբեջանի միջև սահմանը, ըստ որի՝ Հայաստանի Հանրապետության տարածքը պարփակվում էր Երևանի գավառի մի մասով և հարակից մի քանի շրջաններով՝ ընդհանուր առմամբ 10 հազար քառակուսի կիլոմետր տարածությամբ: 4-րդ հոդվածով նախատեսվում էր Թուրքիայի ռազմական օգնությունը, եթե Հայաստանի Հանրապետությունը խնդրեր նրանից՝ «երկրի ներսում կարգն ու հանգստությունն ապահովելու համար»: 5-րդ հոդվածով Հայաստանի Հանրապետության կառավարությունը պարտավորվում էր թույլ չտալ իր տարածքում հակաթուրքական զինված խմբերի կազմավորում: 6-ից 10-րդ հոդվածները հիմնականում ուղղված էին Հայաստանում իսլամադավան բնակչության իրավունքների պաշտպանությանը, երկաթուղիների օգտագործման, փոստ-հեռագրային հարցերին:

Ինչպես սկզբում նշեցինք, Ամենայն Հայոց Կաթողիկոս Գևորգ Սուրենյանցը հայրապետական գահակալության ամբողջ ընթացքում նվիրված էր հայրենական-

ազգային կյանքի խնդիրներին լուծմանը: Այսպես՝ 1912 թ. Կաթողիկոս Սուրենյանցի նախաձեռնությամբ կազմվել է Հայ ազգային պատվիրակությունը՝ Պողոս Նուբարի ղեկավարությամբ, որի վրա դրված էր Հայ դատը եվրոպական կառավարությունների առջև պաշտպանելու առաքելությունը: Հայ դատի պաշտպանության ուղղությամբ կարևոր նշանակություն ունեցան արևմտահայությանը նեցուկ լինելու հայցով Գևորգ Ե Սուրենյանցի հեռագրերը Ռուսաստանի, ԱՄՆ-ի, Իտալիայի, Անգլիայի և Ֆրանսիայի ղեկավարներին: 1914 թ. դեկտեմբերի 28-ին Գևորգ Ե Սուրենյանցի կոնդակով և նրա նախազախությամբ ստեղծվել է Եղբայրական օգնության կոմիտեն, որն զբաղվել է պատերազմի ժամանակ վիրավոր հայ կամավորներին և տասնյակ հազարավոր արևմտահայ զաթականներին օգնություն ցուցաբերելու խնդիրներով: Հայաստանում խորհրդային կարգերի հաստատումից հետո նա կոնդակներով օգնել էր հայությանը կոչ է արել օգնել կառավարությանը հայրենիքի վերակառուցման գործում, վերադառնալ հայրենիք: 1920-ի հոկտեմբերի 30-ին Գևորգ Ե Սուրենյանցը № 416 կոնդակով ապրիլի 11/24-ը սահմանեց «Հայկական տարագրության, կոտորածի զոհերի և բյուրավոր նահատակների հիշատակի հատուկ օր՝ Տոն Ազգային — հիշատակ բյուրավոր նահատակաց մերոց իընթացս համաշխարհային պատերազմի»: Նույն օրը նրա հրահանգով բոլոր եկեղեցիներում պետք է մատուցվեր հանդիսավոր պատարագ, և կատարվեր հոգեհանգիստ: Նրա ջանքերով նորոգվել են եկեղեցիներ, կառուցվել նորերը, բացվել են նոր դպրոցներ, ուսումնական հաստատություններ, ստեղծվել է «Թիֆլիսի հայ քահանայների վերաբանությունը»: Սակայն ժողովուրդը և պատմագրությունն առհասարակ, ինչպես նկատեցինք, Սարդարապատում ունեցած զգալի դերով կշռադատեց Կաթողիկոս Սուրենյանցի վաստակը:

Այսպիսով՝ Գևորգ Ե Սուրենյանցի կաթողիկոսության շրջանը զուգահեռաբար Հայոց պատմության ամենաողբերգական շրջափուլին՝ ցեղասպանություն, մայիսյան հերոսամարտեր, Հայաստանի Առաջին Հանրապետության հռչակում, Հայաստանի խորհրդայնացում, ստալինյան բռնաճնշումներ: Սակայն ոգու արիությամբ և իմաստուն վարքով ճակատագրական շրջանում Ամենայն Հայոց Կաթողիկոսը կարողացավ պատվով պահպանել Ս. Էջմիածինը:

Թաթուլ ԱՎԱՆԵՍՅԱՆ

Պետություն կմնանք, եթե դառնանք մեր ինքնությանը

Նազար անգամ ասված, բայց չընկալված ճշմարտությունների մասին պետք է հազար մեկերորդ անգամ բարձրաձայնել: Մենք ինքնաբավարարված ապրում ենք՝ ճշմարտության մասին դատելու կարողությամբ ճշմարիտ ապրելը շփոթեցնելով: Մինչդեռ դրանք շատ տարբեր են: Հանգստացնելով ուժանք պիտի ասեն, որ բացարձակ ճշմարտություն չկա, որ ամեն ինչ հարաբերական է: Թերևս, բայց դա նույնպես ինքնարդարացման տարբերակ է:

Եթե հայրենիքը քեզ համար անբեկանելի ճշմարտություն է,

ուրեմն կռիվ ունես տալու, ուրեմն չես կարող փախչել: Ի՞նչ ենք արել միասնական լինելու համար: Ցավոք, միասնական եղել ենք պահի մեջ, երբ մեր բնագոյը, ավելի ճիշտ՝ գեներ, գերազանցել է բանականության հաշվարկին, ինչպես 1988-ին: Պահի տրամաբանությամբ հավակնում ենք պետության անկախություն պահել, հավերժելու և հավերժացնելու մասին խոսել: Պահի տրամաբանությունը հատուկ է թույլերին, նպատակ ու գաղափար չունեցողներին: Անշուշտ, տեսականորեն ամենքս էլ թե պետության առաջնորդ-ղեկավարները և թե ժողովուրդը, գի-

տենք, որ պետություն կմնանք, եթե մեր ձեռքը մեր սրտին դնենք, եթե հայրենիքն ապրում դառնա, որի համար դողանք, այլապես, միասնության մասին տարփողելով, ավելի ենք հեռանալու իրարից՝ հայրենիքի անկախ գոյաբանության ճակատագիրը թողնելով համաձային պաշտոնյա-ղեկավարներին, որոնք ազգի ցավին և ուրախությանը տեր կանգնելու փոխարեն միայն արձանագրում են դրանք:

Ազգային ղեկավարություն ասվածը, ամենապարզ տրամաբանությամբ, նշանակում է նաև ժողովրդի թիկունքին կանգնած,

ժողովրդին սատարող ուժ, որը կօգնի ցավը հաղթահարել, ինքն իրեն վերագտնել, սեփական պատմությունը կերտելու կամքը դարձնել վճռորոշ: Ազգային ղեկավարություն ասվածն առաջին հերթին հայրենիքի զինվոր լինել է նշանակում, որը մի թիվ հողի կորստի համար իրեն պատասխանատու կզգա ժողովրդի առջև, որը հայրենիքի պաշտպանության պատվախնդրությանը ստվեր չի գցի՝ աչքը հառնելով օտար հորիզոններին: Այս ամենը բնավ չի հակասում արդեն քանի տարի չարչրկվող «Երրորդ ուժի բացահայտման» փոխափայլությանը: Պար-

գից էլ պարզ է, որ յուրաքանչյուր ազգ գոյատևում է իր ինքնությամբ, սեփական հոգևոր արժեքներով, բայց ապրում է՝ հարաբերվելով տարբեր ժողովուրդների և պետությունների հետ: Ամենայն իմաստով հասկանալի է այսինչ կամ այնինչ ուժի անխուսափելիությունը, ինչը, դժբախտաբար, մեզ ներկայացնում են ոչ թե որպես ցանկացած անկախ պետության համար օրինաչափ երևույթ, այլ որպես մի աներևակայելի գործություն, որի պարտադիր ներկայությամբ է պայմանավորվում մեր լինել-չլինելը:

→ էջ 7

Պետություն կմնանք, եթե դառնանք մեր ինքնությանը

← էջ 6

Այսիքն՝ ինչպես կոմունիստների օրոք, այսօրվա իշխող մտայնությամբ էլ հարություն է առնում մի գերխնդիր՝ հայ ժողովրդին պահել համայնքի հոգեբանությանը՝ թույլ չտալով ապրել անխախտության մերձնաձիճ ինքնավատակությամբ: Եվ դարձյալ մեր մեջ դեռևս ապրող ստրուկը գլուխ է բարձրացնում ու որոշում մեր ապրելիք կյանքը: Ամենքս տագնապած սպասում ենք, թե Հայաստանի Հանրապետության իշխանությունն ազգի ճակատագիրը վճռող հերթական փաստաթուղթը ստորագրելիս այս անգամ հում է ականջալուր լինելու: Մինչդեռ չգիտակցված ժշմարտությունը, որի բացակայությունը անկառավարելի տարրաբեկումների է ենթարկում

հայրենիքի նավը, արյան իշխողությամբ ու վճռական կեցվածքով պետք է պարտադրվի:

Այսօր էլ մեր հայացքն ուղղում ենք օտար «տիրոջ» կողմը՝ հնազանդ ունկնդիր դառնալով քաղաքացիներին, որոնք համոզում են, թե այս անգամ ընտրած «տերը» քաղաքակիրթ է, առաջադեմ: Եթե իմ վիճակը ճորտությունն է, նշանակություն չունի, թե տերս ով է: Եթե անկախ հայրենիքում տիրող զգացում պիտի ունենանք այնքանով, որքանով դրա հնարավորությունը կտա մեր ղեկավարների ընտրած «երրորդ ուժը», ուրեմն մենք մեր տանը վարձակալ ենք:

Արցախյան պայքարի այս ամբողջ ընթացքը մեզ պիտի հուշի, որ օտարը միայն հուսատու է, կարելիք ու խոստումնառատ, բայց

միայն մենք ենք մեր վաղվա տեր: Դժբախտաբար, հաճախ մենք ազդվում ենք համընդհանուր տրամաբանություններից, և պատահական չէ, որ շատերը հեռացան 1988-ի միասնական պայքարից, հակվեցին այն հատվածական սխալ մտայնությանը, թե Արցախի պայքարը արցախցու խնդիրն է, Սյունիքինը՝ սյունեցու, Տավուշինը՝ տավուշցու... Երբ հայրենիքը պատերազմի մեջ է, օրհասական պահի առջև է կանգնած, բոլորս Հայաստանում թե արտերկրում պարտավոր ենք օգտակար լինել հայրենիքին: Եթե մեզ պիտի վախեցնի հայրենիքի ծանր կացությունը, եթե պիտի զլանանք մեր ունեցածը տալ, ուրեմն՝ հայրենասիրական բոլոր զեղումներն ինքնախաբեկություն են: Եթե պի-

տի Հայաստանում, Ամերիկայում, Ռուսաստանում և այլուր մտած սպասենք, որ սկուտեղի վրա մեզ ամբողջական հայրենիք են մատուցելու, և մեզ միայն վայելքն է մնում, սխալվում ենք: Հայրենիքի գոյության երաշխիքը անկախության պահպանումն է, իսկ դա լինում է, եթե հայրենիքիդ տալու մասին ես մտածում և ոչ վերցնելու:

Հայաստանի սոցիալ-տնտեսական կացությունը շատերիս շեղեց Արցախի կողքին կանգնելու ուղուց: Արցախի պայքարն այսօր դարձել է բավության նոխազ: Ոմանք թվում է, եթե չլիներ Արցախի պայքարը, իրենք կապրեին անհոգ ու բավարար կյանքով: Այսպես մտածողները, դժբախտաբար, մոռանում են շատ կարևոր ազդակներից մեկը. սոցիալակա-

նից ու տնտեսականից բացի՝ կա բարոյական խնդիր: Մինչդեռ Արցախի պայքարը ոչ միայն չպիտի հակադրել Հայաստանում ստեղծված իրավիճակին, այլև պետք է հավատանք այն ճշմարտությանը, որ Արցախում մեր հաջողությունները մեցուկ էին Հայաստանին՝ ավելի հեշտորեն հաղթահարելու դժվարությունները:

Դողանք մեր բարոյական արժեքները այս դժվար օրերին անխաթար պահելու զգացման վրա: Առավել դողանք Արցախի պայքարի էջը չփակելու հաստատականության վրա, որովհետև Արցախով է անցնում նաև մեր ինքնահաստատման ճանապարհը...

Ռուզան ԱՌԱՔԵԼՅԱՆ
իրապարակախոս

ՔՐԻՍՏՈՆԵՈՒԹՅՈՒՆԸ ԵՎ ՀԱՅ ՄՇԱԿՈՒՅԹԸ

Հայաստանյայց Առաքելական Սուրբ Եկեղեցու Անդաստանի ծեսը

Սկիզբը՝ նախորդ համարում

Ելնելով Անդաստանի շքերթի բուն բովանդակությունից՝ կարելի է ասել, որ այն պետք է ներկայացնի կոլեկտիվ անհատին, այսինքն՝ շքերթի գործառնություններից կարևորագույն է միասնականության ապահովումը: Սովորաբար ավանդական հասարակության, համայնքի մեջ այդ միասնականությունը կամավոր է. պարբերաբար և որոշակի առիթներով շքերթ կատարելը բխում է ինչպես հանրության, այնպես էլ յուրաքանչյուր անհատի շահերից և հանդիսանում է ներքին պահանջ:

Շքերթի մյուս կարևոր գործառնություններից է տարածական սահմանագծումը, որի մասնավոր դրսևորումներից է շրջանի ամփոփումը: Այս գործառնությունը իր կայուն պարբերականությամբ կապված է տիեզերքի վերահաստատման գաղափարի հետ, որտեղ պարբերականությունն արտահայտվում է շրջանի խորհրդանշանով: Երբ՝ որպես տեղափոխություն մեկ նշանագրված օբյեկտից (օրինակ՝ բնակավայրից կամ հավաքատեղիից) դեպի մյուսը՝ ծիսականապես հատուկ կարևորված կետը (օրինակ՝ տաճարը, սրբավայրը կամ կառավարության շենքը), ուրվագծում է տվյալ շքերթին վերաբերող ծիսական տարածքը: Անդաստանի դեպքում երբ շրջանագծում է եկեղեցու ներսը, եկեղեցու շուրջը, այգին կամ հանդը, որոնք խորհրդաբանորեն ներկայացնում են տիեզերքը կամ աշխարհը:

Շրջանաձև տեղաշարժը կապված է տիեզերական ռիթմի հետ: Հետևաբար ոչ միայն ամբողջական շրջանագծումը, այլև մաս-

նակիցների գործողությունները պետք է ունենան որոշակի հավասարաչափ ընթացք: Որոշ դեպքերում այդ ընթացքն ապահովագրում է երգն ու պարը, մյուս դեպքերում՝ խոսք-բանաձևի խմբովի արտասանությունը կամ համատեղ քայլը: Անդաստանի դեպքում մենք ունենք երգի, խոսք-բանաձևի և համատեղ քայլի ամբողջություն:

Օ. Ֆրեյդենբերգն անտիկ աշխարհի ծիսական երթերի մասին գրում է. «Գործողությունը և ռիթմը՝ որպես մարդկային հասարակության գիտակցության պարզագույն կենսաբանական տարրեր, ամփոփապես ենթարկվում են մեկնաբանության՝ վերածվելով զուգահեռ աշխարհայացքային ձևերի: այդպիսի ռիթմիկ-կինետիկ արարողությունների հնագույն ձևն է քայլելու գործողությունը. ոտքը, քայլը, քայլելով շարժվելը, որոնք իմաստավորվելով շքերթի մեջ որպես արևի շարժում հողի տակ և երկնքով (լույսի անհետացում՝ հայտնություն)՝ նույնացվում են ռիթմի հետ: Այստեղից՝ շրջանով երթերը, շրջանաձև պարերը, ինքը՝ շրջանը, ի հայտ են գալիս հարթության մեջ՝ որպես տարածության սահմանափակ հատվածներ՝ բաղկացած իրար հավասար երեք մասից, որտեղ առաջընթաց շարժումը հավասար է հետընթաց շարժմանը և կանգառին»:

Ինչպես ասվեց վերևում, Անդաստանի ժամանակ հանդիսադիրն ու աղոթասացը շարժվում են շրջանաձև, սակայն ոչ թե միանգամից, այլ կիսաշրջաններով և քառորդ շրջաններով: Եթե հանդիսադիրն արևմուտքից արևելք, իսկ աղոթասացն արևելքից արև-

մուտք (որոշ եկեղեցական սովորություններում աղոթասաց եկեղեցական Ավետարանով կանգնում է հանդիսադրի կողքին մինչև վերջին աղոթքը) շարժվում են կիսաշրջանով, ապա հանդիսադիրն արևելքից հյուսիս, իսկ աղոթասացն արևմուտքից հարավ շարժվում են շրջանի մեկ քառորդով: Ապա հանդիսադիրը կրկին հյուսիսից հարավ, իսկ աղոթասացը հարավից հյուսիս շարժվում են կիսաշրջանով՝ ամփոփելով շրջանը: Անցնելով կիսաշրջանը՝ կանգ են առնում, կատարվում է օրհնություն, որից հետո հակառակ՝ հետընթացով մեկ քառորդ շրջան, մորից կանգնում են, կատարվում է օրհնություն, կրկին անգամ կիսաշրջան առաջընթաց, կանգնում են, կատարվում է օրհնություն: Հետևաբար հանդիսադիրն առանձին շրջան է ամփոփում, աղոթասացը՝ առանձին՝ միահյուսված մեկը մյուսին: Սակայն գործ ունենք ոչ միայն շրջանագծման, այլև շրջանի մեջ խաչի ուրվագծման հետ: Արևմուտք—արևելք ուղղությունը խաչի ուղղահայաց գիծն է, իսկ այն պահին, երբ հանդիսադիրն ու աղոթասացը շարժվում են մեկ քառորդ շրջանով ու կրկին անգամ կիսաշրջան են անում հյուսիս—հարավ ուղղությամբ, օձվում է խաչի հորիզոնական գիծը: Իսկ աշխարհի չորս ծագերը հենց խաչի չորս ծայրակետերն են: Կարող ենք փաստել, որ միաժամանակ առկա են հորիզոնական և ուղղահայաց պոյնտե-ցիաներ:

Որպես կանոն՝ շքերթն ունենում է օժանդակ տարրեր, որոնք մի կողմից ուժգնացնում են նրա հանդիսավորությունը, մյուս կող-

մից նշանագրում են երևույթը որպես շքերթ: Դրանք են.

- ա. լույթությունը կամ երաժշտությունը,
- բ. հատուկ առարկաները,
- գ. մարմնակինետիկան,
- դ. երթուղին,
- ե. զգեստավորում-զարդարումը:

Ինչպես լույթությունը, այնպես էլ երաժշտությունը՝ այդ թվում շխկշխկան (Անդաստանի դեպքում՝ բշոցի ծայրը), հարվածային կամ փողային նվագարաններով անորոշ ծայրատաքերում, քայլերգը, ծիսական օրհներգը խորհրդանշական իմաստով տարբերվում են հասարակ գրույցից, երկխոսությունից՝ նշանագրելով ծիսական հատուկ իրադրություն: Ընդ որում՝ լույթությունը, որպես օրենք, խորհրդանշում է մահը, խոսքը՝ կյանքը, իսկ բուն երաժշտությունը՝ ժամանակից դուրս հայտնվող ծիսական իրականությունը: Սա նշանակում է, որ յուրաքանչյուր շքերթ իր ռիթմիկ երգով ու գործիքային երաժշտությամբ գտնվում է ժամանակից դուրս, ներկայացնում է անսովոր պարագաներ, գտնվում է ժամանակի առասպելական ընկալման համակարգում: Սովորաբար երաժշտության բովանդակությունը փոխանցում է շքերթի նպատակն ու իմաստը: Անդաստանը, լինելով կրոնական շքերթ, ուղեկցվում է երգվող շարականներով և աղոթքներով, սաղմոսներով, հատուկ ընթերցվածքներով, նաև բշոցներով. այդ բոլորը մատնանշում են Անդաստանը որպես հատուկ, ժամանակից անդին ծիսական իրականություն:

Ոչ պակաս կարևոր են շքերթի ընթացքում կիրառվող առարկա-

ները: Ծիսական շքերթում դրանք կազմում են արարողության կորիզը և ապահովում են խորհրդանշական հագեցվածությունը: Ուխտավայր տարվող նվերները և զոհերը, սրբությունների ճշխարմերը, պատկերները, սրբազան գրքերը, կրոնական զանազան խորհրդանշանները կրկնապատկում են սրբության անտես ներկայությունը: Անդաստանի մեջ այս դերում հանդես են գալիս Ավետարանը, ձեռագ խաչերը, խաչվառը և այլն:

Վերջապես՝ շքերթը սովորական իրականությունից անջատում է նաև մասնակիցների հանդերձանքը: Սովորաբար ուխտերի ու տոնական շքերթների համար ավանդական մշակույթում կամ հատուկ զգեստներ են պահել, կամ նորն են կարել և կամ հագել են լավագույն զգեստը: Անդաստանի պարագայում եկեղեցականները կիրառում են եկեղեցական բոլոր զարդերն ու տոնական եկեղեցական զգեստները:

Շքերթի բուն նպատակին հասնելուց հետո, երբ տիեզերակարգը վերականգնված կամ հաստատված է, նրանից ստացած լիցքը, խորհրդանշաններն ու նշանները տեղափոխվում են կենցաղ և աշխարհիկացվում են՝ ավելի ամրապնդելով համայնքը: Օրինակ՝ Ծաղկազարդի Անդաստանի ծեսի ընթացքում օրհնված ուռնու ճյուղերը, հաղողօրհների Անդաստանի ծեսի օրհնված խաղողը կամ մեր նկարագրած խաչվերացի Անդաստանից հետո Ս. խաչի զարդարանք հանդիսացող ռեհանն ու ծաղիկները ժողովուրդը տուն է տանում:

Անուշավան Եպիսկոպոս
ԺԱՄԿՈՅՅԱՆ, պ. գ. դ.
Կարեն ՅՈՎՀԱՆՆԻՍՅԱՆ, պ. գ. ք.

Ակսել Բակունց ԱՂՈԹՔ

Միայն Քեզ, Տեր, միայն Քեզ եմ աղոթում:

Ընդունիր, Տեր, իմ աղոթքը՝ սրտիս խորքերից բխած, թող Քեզ հաճելի լինեն իմ տանջված հոգու մրմունջները, և աղերսանքս մի՛ մերժիր, Տեր: Այս ուշ գիշերին, այս խավար գիշերին, երբ հոգիներն են գրուցում աստղերի հետ, և հազարավոր մարդիկ աղոթք են կարդում Քեզ, այս մութ գիշերին մի՛ մերժիր հոգնած ու մոլար մարդու աղերսը:

Իմ միակ ապավենն ես Դու, Տեր, և հույս ու հանգրվանս: Քեզ

նից հզոր ու կարող չկա երկրում, Քո արդարությունը միակն է, Տեր, ինչպես վրեժը: Հազարավոր կարոտյալների ու տանջվածների հոգուց եմ խոսում Քեզ հետ, և նրանց հոգուց, որոնք աղոթել չգիտեն, աղոթքի են պապակ:

Տեր, հզոր ես և կարող...

Հեռացրու տանջանքն այս ահավոր, զրկանքները բյուրավոր, էլ թող արցունքներ չհոսեն, թող հևոց չլինի, թող իրդեհ չլինի: Տեր, թռչունները բնակարանս են, այգիներն ամայի են, և շենքեր՝ ավերակ, մարդ չկա՝ վարդի հոտով զմայլվող, Տեր, ծուխ է ամենուր, տաճարներիդ գմբեթները հողի հետ են հավասարվում, Քո տները ավերվում են: Մոխիրը շատ է, արյունով հագեցավ երկիրը:

Հեռացրու, հեռացրու, հեռացրու....

Խաղաղություն տուր երկրին, թող ծաղիկները բույր տան, թող առաջվա պես առունները կարկաչեն, և աստեղագարդ երկնքի տակ մարդիկ գովքդ մրմնջան, աղոթեն Քեզ:

Ամայի դաշտերում գայլերն են ոռնում, մենավոր շիրիմներն են աղերսում Քեզ: Տեր, անթաղ մեռելները Քեզնից հանգիստ են խնդրում, մի կտոր տեղ երկրի գրկում՝ պառկելու:

Տեր, հազարավոր մատաղ կյանքեր մահացան, երազներ տրորվեցին, խինդն անցավ, և արցունքից մեր աչքերը կուրացան: Ի՞նչ եղան ի՞նչ երգերը, ո՞վ էր այն անգութը, որ խլեց բոլորը, հրդեհեց տաճար-

ները և հոգիները ամայի, ավերակ դարձրեց:

Հին լավ օրերը տուր, լավ օրերը բեր, ինձ Հերդային տուր: Խնայիր Հերդային, նրա հոգուն խնայիր: Այնքան շատ են Հերդաները: Քանիսներն են աղոթում, կարոտը հոգում, լավ օրեր տեսնելու հույսը սրտում: Շատերն են երազում հին պալատները, որ կառուցել են խինդով, եռանդով, վայելքի ու աղոթքի համար:

Հոգանել ենք, Տեր, էլ ուժ չունենք, էլ դիմանալ չենք կարող: Ծանր է բեռը, մեր ուսերը կքվեցան, մեր ծունկերը կորացան: Մարեցին, մարեցին բյուրավոր հույսեր, և խավարի մեջ հանգան մատաղ կյանքեր, երազներով, հույզերով հարուստ, մո-

մի պես հալվեցին, ոչնչացան սերունդներ:

Տեր, հզոր ես, ավերը դադարեցրու.... թող վայելեն Հերդայի սերը, ես դեռ գուրգուրանք եմ ուզում, ես ապրել ու վայելել եմ ուզում, ես ստեղծել եմ ուզում, իմ հոգին կերտել է ցանկանում:

Արյունը վայելք չէ, ավերը կերտվածք չէ, Տեր:

Տեր, բոլորին իրենց Հերդաները տուր, ի՞նչ պարտեզներում թող սիրո բառերը հնչվեն, թող երգեն առաջվա պես և ստեղծագործեն, նոր շենքեր կերտեն:

Թող կառուցեն, Տեր, թող հորինեն: Արյունը հերիք եղավ, մոխիրը շան-շատ է...

Քրիստոսի հրաշափառ Հարությունից հիսուն օր հետո Հայ Առաքելական Եկեղեցին տոնում է Հոգեգալուստը, որը կոչվում է նաև Պենտեկոստե, ինչը հունարենից թարգմանաբար նշանակում է հիսուներորդ։ Սբ. Ներսես Շնորհալի հայրապետի սահմանած կարգի համաձայն՝ Հայ Եկեղեցին Հոգեգալուստյան տոնը նշում է յոթ օր շարունակ։ Այն ունի 35 օրվա շարժականություն՝ կապված Սբ. Զատիկի փոփոխականության հետ։

Արևելյան Ուղղափառ Եկեղեցում Պենտեկոստեն հույժ կարևոր տոներից մեկն է։ Այդ օրը եկեղեցիները հաճախ զարդարված են լինում կանաչ գույնով և տարատեսակ ծաղիկներով։ Նրանց համար կանաչ գույնը կարծես այդ օրվա խորհրդանշին է։ Անգամ որոշ եկեղեցիներում Պենտեկոստեի օրը՝ սուրբ պատարագի ժամանակ, հոգևորականների ու հավատացյալների ձեռքերին լինում են ծաղիկներ և կանաչ ճյուղեր։ Իսկ ահա Արևմտյան Եկեղեցիները Հոգեգալուստյան տոնի հիմնական նշան են համարում կարմիր գույնը։ Այն խորհրդանշում է Սուրբ Հոգու հրեղեն կրակը և խնդությունը։ Արևմտյան Եկեղեցիներում Պենտեկոստեի սուրբ պատարագը նույնքան հարուստ և բազմազան է, որքան Արևելքում։ Քահանաները, սպասավորները, երգչախումբը և ժողովուրդը տոնակատարությունների ժամանակ հագնում են կարմիր զգեստներ։

Լինելով քրիստոնեական մեծագույն խորհուրդ պարունակող տոն՝ Հոգեգալուստը սերտ աղերսներ ունի հուղայական Շավիտո կոչվող տոնի հետ, որը նշվում էր Պատեքին հաջորդող հիսուներորդ օրը։ Շավիտոն նաև հայտնի էր «Շաբաթների տոն» անվամբ, իսկ ռաբինական գրականության մեջ՝ «50 օրվա տոն»։ Հակիրճ անդրադառնալով այս տոնի նշանակությանը։

Պաղեստինում ամեն տարի երկու բերքահավաք կար։ Առաջին բերքահավաքը լինում էր մոտավորապես մայիս և հունիս ամիսներին, իսկ վերջինը՝ աշնանը։ Պենտեկոստեի տոնակատարությունը կատարվում էր վաղ բերքահավաքի սկզբում, ինչը նշանակում էր, որ այն միշտ նշվում էր մայիսի կեսին կամ երբեմն հունիսի սկզբին։ Այսպես՝ գոյություն ուներ հրեական երեք մեծ տոն, որոնց օրինականորեն պարտավոր էր մասնակցել յուրաքանչյուր հրեա տղամարդ, որն ապրում էր երուսաղեմից 20 մղոն հեռավորության վրա։ Այդ տոներն էին Սուրբը, Պենտեկոստեն և Տաղավարահարաց տոնը։ Որոշ գիտնականներ ասում են, որ Պենտեկոստեն երուսաղեմում ավելի շատ մարդիկ էին հավաքվում, քան նույնիսկ Պատեքին։ Տոնն ուներ երկու հիմնական նշանակություն։ Միայն հիշատակվում էր Աստծո սրբազան օրենքի շնորհումը Մովսեսին, որը եղավ Սինայ լեռան վրա Եփրատից ելնելուց 50 օր հետո, երկրորդ՝ այն գյուղատնտեսական կարևորություն ուներ, քանի որ Աստծուն մատուցվում էր բերքի երեխայիցը Պատեքի ժամանակ, իսկ Պենտեկոստեի օրը նվիրաբերվում էր «երկու հաց»՝ որպես երախտագիտություն Տիրոջը՝ շնորհված բերքի համար։ Ահա այսպիսի հիշարժան տոնը մեծապես արժևորվում և վերափմաստավորվում է նորկապարարման ժամանակներում։ Այն իրավամբ համարվում է Եկեղեցու ծննդյան օր։ Այժմ փորձենք հասկանալ, թե ինչ տեղի ունեցավ այդ օրը։

Ղուկաս ավետարանիչն այսպես է ներկայացնում պատումը. «Եվ հանկարծ երկնքից սաստիկ հողմի մեջ մի ձայն հնչեց ու լցրեց ամբողջ տունը, որտեղ նստած էին։ Եվ նրանց երևանքին բաժանված հրեղեն լեզուներ, որոնք նստեցին նրանցից յուրաքանչյուրի վրա։ Եվ ամենքն էլ լցվեցին Սուրբ Հոգով ու սկսեցին խոսել ուրիշ լեզուներով, ինչպես որ Սուրբ Հոգին խոսել էր տալիս նրանց» (Գործք Բ 2–4)։ Սբ. Հոգին չեկավ զաղտնաբար, այլ իբրև սաստիկ հողմ և լցրեց ամենքին։ Նա անուշաբույր հոտ տարածեց և ամանհույս և պարզեց երուսաղեմին՝ Աստծո սուրբ քաղաքին։ Առաքյալների միջոցով Սուրբ Հոգու անուշահոտությունը լցվեց ամբողջ տիեզերքում, ինչպես և Պողոս առաքյալն է ասում. «Քանի որ Քրիստոսի բուրմունքն ենք Աստծու առաջ՝ և՛ փրկվածների մեջ, և՛ կորստյան մատուցվածների մեջ» (Բ Կորնթ. Բ 15)։

Այնուհետև ավետարանիչը շարունակում է նկարագրել, թե այդ պահին երուսաղեմում բնակվում էին աստվածավախ հրեաներ՝ երկուլած մարդիկ, երկնքի տակ բոլոր ազգերից, որոնք լսեցին ձայնը, եկան և տարակուսած հավաքվեցին, և յուրաքանչյուրը լսում էր, որ նրանք խոսում էին իրենց լեզուներով (Գործք Բ 5–6)։ Արդ, Կենդանարար և Ազատիչ Հոգու



Հոգեգալուստ

յոթնապատիկ պարզևները նվիրագործեցին ոչ միայն Քրիստոսի աշակերտներին, այլև Աստծո երկյուղով լցված այլազգի մարդկանց, որոնք զարմանքից պարուրվել էին անասելի գիտությանը։ Անտարակույս Սուրբ Հոգու գալուստը Վերնատան մեջ պարզապես նորակազմ Եկեղեցու անդամներին միախառնել էր, այլ նրանց վրա աստվածային շնորհների հեղումն էր, որպեսզի նրանց հոգիները զորամային, մտքերը լուսավորվեին։

Արարիչ Սուրբ Հոգին դեռևս աշխարհի արարման օրերին շրջում էր ջրերի վրա և սրբացնում արարչությունը։ Նա առաջնորդելով հանեց Իսրայելին Եփրատից՝ ստրկության տնից, և տարավ խոստացված երկիրը։ Նրանով է, որ շնորհներով լցվեցին Մովսեսը և յոթանասուներկու իմաստունները (Թվեր ԺԱ 25–29)։ Հիմարվի Սուրբ Հոգու աստվածացնող գալուստը քարոզվել էր դեռևս հիմնականորեն մարգարեների կողմից։ Այն ակնհայտ իրագործումն էր այն խոստման, որը հարյուրավոր տարիներ առաջ Հովել մարգարեի բերանով Աստծված հայտնել էր. «Եվ կլինի, որ սրանից հետո Իմ Հոգուց կհեղեն ամեն մարմնի վրա, և կմարգարեանան ձեր ողորդներն ու ձեր դուստրերը, ձեր ծերերը երազներով կերազեն, և ձեր երիտասարդները տեսիլքներ կտեսնեն։ Իմ ծառաների վրա և Իմ աղախիճների վրա այն օրերին Իմ Հոգուց կհեղեն, և կմարգարեանան։ Նշաններ ցույց կտան վերևում՝ երկնքում, և նշաններ ներքևում՝ երկրի վրա. արյուն, հուր և ծխե մրրիկ» (Հովել Բ 28–30)։ Քամին՝ իբրև ազատարար խորհրդանշ Սուրբ Հոգու, խոսում էր Եզեկիել մարգարեի հետ մի դաշտում, որը լի էր մարդկանց ոսկորներով (Եզեկիել 37)։ Մեր Փրկիչն Ինքն օգտագործեց քամու այս պատկերը Սբ. Հոգուն բնութագրելու համար, երբ Նիկիոյից նույն ժամանակում էր, թե ինչ կարևոր էր Հոգու կողմից վերստին ծնվելը (Հովհ. Գ)։ Հիսուս Ինքն ասաց. «Եթե Իմ սիրում եք, կպահեք Իմ պատվիրանները. և ես պիտի աղաչեմ Հորը, և Նա մի այլ Մխիթարիչ պիտի տա ձեզ, որպեսզի հավիտյան ձեզ հետ բնակվի ճշմարտության Հոգին» (Հովհ. ԺԴ 15–17)։ Եվ դարձյալ՝ «Մխիթարիչը՝ Սուրբ Հոգին, որին Հայրը կուղարկի Իմ անունով, Նա ձեզ ամեն բան կուսուցանի և ձեզ կհիշեցնի այն ամենը, ինչ ես ասացի ձեզ» (Հովհ. ԺԴ 26)։ Ասաց նաև. «Դեռ շատ բաներ ունեն ձեզ ասելու, բայց այժմ չեք կարող տանել։ Երբ որ գա Նա՝ ճշմարտության Հոգին, ամենայն ճշմարտութեամբ կառաջնորդի ձեզ» (Հովհ. ԺԶ 12–13)։

Մեծապես ուսուցանելի է Հոգեգալուստից առաջ Քրիստոսի ճշմարիտ հետևորդների կեցվածքը։ Գործք Ա 14-ում ասվում է. «Սրանք բոլորն էլ միասին համապագությամբ աղոթքի մեջ էին։ Նրանց հետ էին նաև կանայք, ինչպես և Մարիամը՝ Հիսուսի մայրը, և նրա եղբայրները», իսկ Գործք Բ 1-ում ասվում է. «Պենտեկոստեի օրերը լրանալուց հետո բոլորը միասիրտ ու միատեղ էին»։ Աստվածաշնչյան այս նկարագիրը

ընդ ցույց է տալիս, թե ինչպիսի կեցվածք ուներ մի ժողովուրդ, որը պետք է ընդուներ Աստծո Հոգու զորությունը։ Այսօր էլ մեզ համար վերոնշյալից մի քանի կարևոր հանգամանք օրինակելի է։ Առաջինը մեկ վայրում միահոգի լինելն է։ Անշուշտ քրիստոնեական կյանքում միայնակ չենք կարող ճամփորդել դեպի փրկություն, քանի որ մեզ պետք են մեր հոգևոր եղբայրներն ու քույրերը՝ որպես մի ամբողջություն Քրիստոսի մեկ մարմնի՝ Սուրբ Եկեղեցու։ Շնորհք Պատրիարքն ասում է. «Ինչհիմա առաքյալները բոլորը միաբանված էին։ Պատճառը շատ պարզ ու բացահայտ էր. որովհետև նրանք միասին ապրել ու միասին տառապել էին... միասին տկարացել և վերջապես միասին երջանկացել էին։ Եվ հետևաբար միասին էլ մեկ հոգով լցվել»։ Այսպես՝ Մխիթարիչ Սուրբ Հոգու գալուստը կատարվեց, երբ Հիսուսի աշակերտները միասին էին, միախորհուրդ և միաբան։ Երբ մենք էլ համախմբվենք և մոտեցնենք իրար մեր սրբազան ջախերը, հրդեհ ու բոց կլինի, որը ոչ մի թշնամու ուժ չի կարող հանգցնել։ Երկրորդ՝ աղոթքի ոգով լցվելու անհրաժեշտությունն է այն գրավականը, որով Աստծո Հոգին կբնակվի մեր մեջ։ Աղոթքի մեջ հարատևելով՝ մենք պետք է բացենք մեր սրտերը Աստծու առաջ՝ թույլ տալով, որ Բարձրյալը հեղի իր շնորհները։ Այժմ էլ մեր Առաքելական Եկեղեցին, մեծ իմաստ տալով Հոգեգալուստյան տոնի պատրաստությանը, պահեցողությամբ և աղոթքով է դիմավորում այն, քանի որ երբ Տերը մկրտվեց, Հոգին Նրան տարավ անապատ, և այնտեղ Տերը քառասուն օր ու քառասուն գիշեր պահեց մեզ էր։ Երրորդն Աստծո խոսքին ակամջալուր լինելն է այն սրտում փայփայելով պահելն է։ Սուրբ Գիրքն ահարկու զորությամբ է ազդում մարդկանց հոգիների վրա, քանի որ «կենդանի է Աստծու խոսքը, ազդու և ավելի հաստու, քան որևէ երկսայրի սուր, այն թափանցում է մարդու շնչի ու հոգու մեջ, մինչև ողնածուծը և քննում է մտածումներն ու սրտի խորհուրդները» (Եբր. Դ 12)։ Չորրորդը հուսալիք սպասում է, որ Աստված կգործի մեր մեջ և կտարածի Իր փառքը։ Մեր օրերում, երբ կյանքում ինչ-որ բան սխալ է ընթանում, մենք ինքնաբերաբար հակված ենք մեղադրել Աստծուն՝ մոռանալով, որ Աստված կարող է օգտագործել այն բաները, որոնք այնքան մերժելի են մեզ համար և բարին դարձնել մեզ։ Հինգերորդն Աստծո մխիթարիչ ուժը ստացող ժողովրդի քարոզչությունն է։ Յուրաքանչյուր հավատացյալ՝ որպես մի մասնիկ Եկեղեցու, հարկ է, որ սերմանի Աստծու պատվիրաններն ամենուր։ Ինչպես Պետրոս առաքյալը քարոզեց Հոգեգալուստյան օրը, և ոմանք. «հոժարությամբ ընդունելով նրա խոսքը, մկրտվեցին, և այն օրը նրանք մոտ երեք հազար հոգով ավելացան» (Գործք Բ 41)։ Ահավասիկ սրանք են այն փրկության փարոսները, որոնց առկայությամբ Տիրոջ ժողովուրդը ընդունեց Երկնավորի Հոգու զանազան շնորհները։

Այսօր էլ Սուրբ Հոգին, լինելով հրեղեն լեզուներ սփռող, սրբացնում է մեզ՝ այրելով սեփական մեղքերն ու անբարո ցանկությունները։ Հոգեգալուստն այն օրն է, երբ Աստծո կրակը նվիրագործում է յուրաքանչյուրին։ Այն օրն է, երբ Աստծո քամին թարմությամբ փչում է մեր սրտերում և հոգիներում։ Այս սրբազան տոնը մոտ երկու հազար տարի առաջ եղավ ու չվերջացավ։ Մեզ՝ քրիստոնյաներիս համար Նրա գալուստը կարող է լինել ամեն րոպե, ամեն ժամ ու ամեն օր, եթե մենք մեր սրտերն ու հոգիները պատրաստենք՝ Աստծու Հոգու անսպառ շնորհները որոնեցնելու համար։ Հոգեգալուստյան տոնն ամեն տարի մշտամյա հնարավորություն է ընձեռում մեզ՝ հավատացյալներիս, Քրիստոսի աշակերտների օրինակով մեկտեղվելու և վերստին Սբ. Հոգու կրակով այրվելով՝ հալածելու անգիտության խավարը և լցվելու Քրիստոսի ջերմ սիրով, որով երկնային Տիրոջը կօրհներգեն բոլոր լեզուները։ «Հորից ուղարկված աղավմին (Սուրբ Հոգին), մեծածայր հնչումով լույսի փայլատակման նմանությամբ բարձունքից իջնելով, անկիզբի կրակով զինեց աշակերտներին, երբ նրանք Վերնատան մեջ նստած էին։ Անմյուսական աղավմի, ինքը անքննելի, որ Աստծու խորհուրդներն էլ քննում և Հորից վերցնելով՝ հիշեցնում է մեզ ահավոր երկրորդ գալուստյան մասին։ Հոգու համար մեզ քարոզեցին, թե Նա Համագոյ է Հորը և Որդուն։ Օրինություն բարձունքներում Հորից բխող Սուրբ Հոգուն, որի անմահական բաժակով առաքյալները հարբեցին և երկրին երկինք հրավիրեցին»։

ԵԵՆԱ ԱՂԱԽԱՆՅԱՆ
Հայկ սրկ. ՍԱՐԳՍՅԱՆ

Աստուածաշունչ՝ գիրք գրող



....Ահաւասիկ դուք այսօր պատրաստվեցիք ելնելու ձեր թշնամիների դէմ։ Ձեր սրտերը թող ջրաւանաւ, ծի՛ վախեցեք, ծի՛ վարհուրեք ու նրանցից խոյս ծի՛ րուեք, որովհետեւ Ձեր Տեր Աստուածը ձեզ հետ գնուծ է ձեր առջևից, որպէսզի ձեզ հետ պատրաստե՛լով ձեր թշնամիների դէմ փրկի ձեզ։

Երկրորդ օրէնք, 20:3-4

ՏՕՆՔ ԵՒ ՅԻՇԱՏԱԿՈՒԹՅՈՒՆՔ

ՅՈՒՆԻՍ

- † Սրբոյն Գրիգորի Լուսաւորչին մերոյ ելն ի վիրապէն — *յուճիս 1*
- † Տօն Կաթողիկէ Ս. Էջմիածնի — *յուճիս 2*
- † Բարեկենդան Ս. Գրիգոր Լուսաւորչի պահոց — *յուճիս 9*
- † Գիւտ Նշխարաց Սրբոյն Գրիգորի Լուսաւորչին մերոյ — *յուճիս 15*
- † Սրբոց թարգմանչաց հարցն մերոց Սահակայ եւ Մեսրոպայ — *յուճիս 20*
- † Բարեկենդան Վարդավառի պահոց — *յուճիս 30*

ՔՐԻՍՏՈՆՅԱ
ՉԱՅԱՍՏԱՆ

Կրօնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»
թերթի խմբագրություն

Գլխավոր խմբագիր՝

Նարինե Հովհաննիսյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/

kristonya-hayastan

Ստոր. տպագր. 3.06.2024 թ.

Տպաքանակը՝ 1265